

春秋胡傳

十九之三十三

5  
21  
12


成


東 京 圖 書 館			
二	五	二	經
一	六	二	書
冊	號	架	函 類

漢 書 門			
二	一	四	五
一	九	三	九
冊	架	函	號 類

內 閣 文 庫			
三	五		漢
五	九		
函	二	一	
二	一	三	
架	冊	號	類

內 閣 文 庫	
番 號	漢 5913
冊 數	21 ( 12 )
函 號	275 241





春秋卷之十九

淺草文庫

胡安國傳

附林堯叟音註括例始末

成公上

公名黑肱宣公子諡法安民立政曰成

周

定王十七年魯成公五年定王崩子簡王立

鄭

襄公十五年魯成公四年襄公卒悼公費立成六年悼公卒弟成公踰立

齊

頃公九年魯成公九年頃公卒子靈公環立

宋

文公二十一年魯成公二年文公卒子其公固立成十五年其公卒子平公成立

晉

景公繼霸十年時卻克為政魯成公四年欒書為政成十年景公有疾晉人立太子州蒲是為厲公是年景公卒成十八年厲公弑悼公周立韓厥為政

春秋卷十九

成公上

一豹變齊

衛 穆公十年、魯成公二年、穆公卒、子定公  
臧立、成十四年、定公卒、子獻公衍立

蔡 景公  
二年

曹 宣公五年、魯成公十三年、  
宣公卒、弟成公負芻立

滕 文公十年、魯成公十六  
年、文公卒、成公原立

陳 成公  
九年

杞 桓公四  
十七年

薛 詳見隱  
公元年

莒 魯成公十四年、莒子朱卒、一名渠  
丘公、黎比公密州立、又名買朱鉏

邾 定公二十四年、魯成公十  
七年、定公卒、宣公景經立

許 靈公二年、魯成公  
十五年、許遷于葉

小邾 詳見僖  
公元年

楚 共王元年、魯成十六年、子及將中軍、子重將  
左、戰鄢陵、楚敗績、晉射共王中目、楚殺子及

秦 桓公十五年、魯成公十  
四年、桓公卒、子景公立

吳 魯成公七年、吳伐郟、始見經、  
即吳子壽夢也、壽夢一名乘

越 詳見隱  
公元年

辛 定王十  
七年 元年 晉景十年、齊頃九年、衛穆十年、  
蔡景二年、鄭襄十五年、曹宣五

年、陳成九年、杞桓四十七年、宋文二  
十一年、秦桓十五年、楚共王審元年

春王正月、公即位

二月辛酉葬我君宣公

無冰

寒極而無冰者常燠也。按洪範傳曰：豫恒燠。若此政事舒緩，紀綱縱弛之象。成公幼弱，政在三家，公室不張，其象已見。故當洞陰，而常燠應之。古者日在北陸，而藏冰，獻羔而啓朝之祿，位賓食喪祭，冰皆與焉。此亦燮調愆伏之一事也。今既寒而燠，遂廢凌人之職。然策書所載，皆經邦大訓，人有微而不登其姓名，事有小而不記其本末，雨雹冰雪何以悉書。天人一理也。萬物一氣也。觀於陰陽寒暑之變，以察其消息盈虛，此制治於未亂，慎於微之意也。每慎於微，然後王事備矣。

三月作丘甲

作丘甲，益兵也。古者九夫為井，四井為邑，四邑為丘，四丘為甸。甸地方八里，旁一里為成，所取於民者出長轂一乘，此司馬法一戎之賦也。為齊難作丘甲，益兵備敵，重困農民，非為國之道。其曰作者不宜作也。唐太宗問李靖楚廣與周制如何，靖曰：周制一乘步卒七十二人，甲士三人，以二十五人為一甲，凡三甲，共七十五人。然則一丘所出十有八人，積四丘而具一乘耳。今作丘甲者，即丘出一甲，是一甸之中，共百人為兵矣。則未知其所作者，三甸而增一乘乎，每乘而增一甲乎，魯至昭公時，嘗蒐于紅，革車千乘，則計甸而增乘，未可知也。楚人二廣之法，一乘至用百有五十人，則魯每乘而增一甲，亦未可知也。賦雖不同，其實皆為益兵，其數皆增三之一耳。先儒或言甲非人人之所能為，又以為丘出甸賦加四音註，廣古曠反，並同。

夏臧孫許及晉侯盟于赤棘

初宣公謀以晉人去三桓歸父為是見逐而奔齊矣今季孫當國恨齊人之立宣公納歸父又懼晉侯之或見討也故往結此盟赤棘晉地也其稱及魯所欲也盟非春秋所貴而惡屢盟者非惟長亂亦國用民力所難給也成公即位之初方經大故未有施舍已責逮鰥寡救乏困之事也為齊難既作丘甲矣聞將出楚師又遠與晉尋盟豈固本保邦之道乎書及晉侯盟於赤棘非特備齊懼晉蓋三桓懷忿懟君父之心將有事于齊而汲汲欲之者罪可見矣

秋王師敗績于茅戎

**音註**

茅戎別種也

程氏曰王師於諸侯不言敗諸侯不可敵王也於夷狄不言戰夷狄不能抗王也不可敵

不能抗者理也其敵其抗王道之失也桓王伐鄭兵敗身傷而經不書敗存君臣之義立天下之防也劉康公邀戎伐之敗績於徐吾氏而經不書戰辨華夷之分立中國之防也是皆聖人筆削非魯史之舊文也然筆於經者雖以尊君父外戎狄為義而君父所以尊戎狄所以服則有道矣桓王不以討賊興師而急於伐鄭康公不以惇信持國而輕於邀戎是失其所以君天下禦四夷之道也書敗績于茅戎者言自敗也其自反亦至矣

冬十月

**壬**定王十二年 晉景十一、齊頃十、衛穆十一、卒  
**申**八年 蔡景三、鄭襄十六、曹宣六、陳成

十、杞桓四十八、宋文二十  
二、卒、秦桓十六、楚其二

春齊侯伐我北鄙

初魯事齊謹甚，雖易世而聘會不絕也。及與晉侯盟于斷道，而後怨隙成。再盟于赤棘，而後伐我北鄙。齊侯之興是役，非義矣。魯人為鞏之戰，豈義乎？同日憤兵，務相報復，而彼此皆無善者，則亦不待貶而罪自見矣。

**音註**

斷音短

夏四月丙戌，衛孫良夫帥師及齊師戰于新築。

衛師敗績

**音註**

新築，衛地。書大夫帥師於是始。

齊師侵虐，而以衛主此戰，何也？衛侯初與晉同盟于斷道矣，又使世子臧與晉同伐齊矣。又使孫良夫、石稷將侵齊矣，及與齊師遇，石稷欲還，良夫不可，曰：「以師伐人，過其師而還，將謂君何？若知不能，則如無出，今既遇矣，不如戰也。」遂戰于新築。故齊師雖侵虐，而此戰以衛主之也。春秋善解紛，貴遠怨，而惡以兵刃相接，故書法如此。

六月癸酉，季孫行父、臧孫許、叔孫僑如、公孫嬰

齊帥師會晉郤克、衛孫良夫、曹公子首及齊侯

戰于鞏，齊師敗績

**音註**

鞏，齊地，去齊五百里。音安。書會四卿，是各自

為師也。自文之季年而無使介，至是而無將佐，魯三家之勢成矣。

大國三軍，次國二軍，魯雖大國而四卿並將，是四軍也。當此時舊制猶存，尺地皆公室之土也。一民皆公室之兵也。上卿行父與僑如，嬰齊各帥一軍會戰，而臧孫許如晉乞師，又逆晉師為之道。本不將兵，特往來晉魯兩軍之間，預謀議耳。成公初立，主幼國危，為季孫一怒，埽境內與師，而四卿並出，肆其憤欲，雖無人乎成公之側，有不恤也。然後政自季氏出矣。將稱元帥，畧其副屬，詞之體也。而四卿皆書者，豈特為詳內錄哉？堅冰之戒亦明矣。

經之大例受伐者為主而此以四國及之者以一笑之微殘民毒衆幾獲其君而怒猶未怠焚雍門之茨侵車東至海故以四國主之爲憤兵之大戒見諸行事深切著明矣

秋七月齊侯使國佐如師已酉及國佐盟于袁

**婁音註**

袁婁齊地去齊五十里○楚屈完來盟于師齊桓公退師而後盟于召陵修禮

於楚也齊侯使國佐如師晉卻克進師而後盟于袁婁不禮於齊也夫以齊桓公之所不敢而四國之大夫敢爲之甚矣鞏戰之忿也

齊國佐如師與楚屈完來一也然陘之役則曰來盟于師盟於召陵鞏之戰則曰及國佐盟于袁婁何也荆楚暴橫憑陵諸夏齊桓公仗義聲罪致討威行江漢之上不待加兵而楚人怙服其書來盟于師者楚人自服而求盟也盟于召陵者桓公退舍禮與之盟也在

春秋時斯爲善矣若夫袁婁則異於是齊雖侵虐未若荆楚之暴也諸國大夫含憤積怒欲雪一笑之恥至於殺人盈野非有擊強扶弱之心國佐如師將以賂免非服之也晉大夫又不以德命使齊人盡東其敵而以蕭同叔子爲質夫蕭同叔子齊君之母也則齊悖矣由是國子不可請合餘燼背城借一揖而去之卻克使魯衛之使以其詞爲之請逮于袁婁而與之盟則汲汲欲盟者晉也故反以晉人及之若此類見曲直之繩墨矣是故制敵莫如仗義天下莫大於理而強有力不與焉亦可謂深切著明矣

八月壬午宋公鮑卒

**音註** 文公卒子共公固立

庚寅衛侯速卒

**音註** 穆公卒子定公立

取汶陽田

**音註** 汶陽魯地汶音問

汶陽之田本魯田也取者得非其有之稱不  
曰復而謂之取何也恃大國兵力一戰勝齊  
得其故壤而不請於天王以正疆理則取之  
不以其道與得非其有奚異乎然則宜奈何  
考其建邦土地之圖若在封域之中則先王  
所錫先祖所受經界世守不可亂矣不然侵  
小得之春秋固有與或國繼絕世之義必有  
處也魯在戰國時地方五百里而孟氏語慎  
子曰如有王者作在所損乎在所益乎經  
於復其故田而書取所損益亦可知矣

冬楚師鄭師侵衛

十有一月公會楚公子嬰齊于蜀音註

蜀魯地  
○自屈

完以來楚大夫皆無氏  
族而書公子自嬰齊始

按左氏魯衛受盟于晉從於伐齊故楚為陽  
橋之役令尹子重曰師衆而後可於是王卒

盡行二國稱師著其衆也侵衛則書侵我師  
于蜀致賂納質沒而不書非諱也書其重者  
則莫重乎其以中國諸侯降班失列下與夷  
狄之大夫會也季孫行父為國上卿當使其  
君尊榮其民免於侵陵之患而危辱至此特  
起於忿伎肆其褊心而不知制之以禮也書  
曰必有忍乃其有濟懲忿窒慾德之修也不  
伎不求行之善也躬自厚而薄責於人遠怨  
之方也季孫忿伎弗能懲也而辱逮君父不  
亦憊乎故春秋史外傳心之要典也攷其行  
事深切著明於以反  
求諸已則亦知戒矣

丙申公及楚人秦人宋人陳人衛人鄭人齊人

曹人邾人薛人鄆人盟于蜀音註

楚於是始與  
中國準自此

以下楚卿不  
書皆貶也



盟而魯與必先書公尊內也次書主盟者衆所推也此書公及楚人則知主盟者楚也公  
子嬰齊秦石說宋華元陳公孫寧衛孫良夫鄭去疾皆國卿也何以稱人楚僭稱王春秋  
黜之北諸夷狄晉雖不競猶主夏盟諸侯苟能任仁賢修政事保固疆圉要結鄰好同心  
擇義堅事晉室荆楚雖大何畏焉今乃西向服從而與之盟不亦恥乎古者用夏服夷未  
聞服於夷也乃是之從亦爲不善擇矣經於魯君盟會不信則諱公而不書不臣則諱公  
而不書棄中國從夷狄則諱公而不書蜀之盟棄晉從楚書公不諱何也事同而既貶則  
從同同正始之義也從荆楚而與盟既諱公於僖十九年齊之盟矣是以於此不諱而人  
諸國之大夫以見意也

癸酉 定王十三年 晉景十二齊頃十一衛定公滅元年蔡景四鄭襄十七曹宣七

陳成十一年杞桓四十九宋共公固元年秦桓十七楚共三

春王正月公會晉侯宋公衛侯曹伯伐鄭

按左氏諸侯伐鄭討邲之役也遂東侵鄭公子偃帥師禦之覆諸鄆敗諸丘輿夫討邲之役則復怨勦民非觀釁也遂東侵則潛師掠境非以律也覆而敗諸則專用詐謀非正勝也度彼參此皆無善也畧而不紀勝負微也晉侯稱爵而以伐書何也初爲是役必以鄭之從楚也附蠻夷擾中國則盟主有詞于伐耳宋衛未葬曷爲稱爵背殞越境以吉禮從金革之事也

音註

鄭芒 袁反

辛亥葬衛穆公

二月公至自伐鄭

甲子新宮災三日哭

廟災而哭禮也得禮為常事則何以書緱氏劉絢曰新宮者宣宮也不曰宣宮者神主未遷也知然者丹楹刻桷皆稱桓宮此不舉謚故知其未遷也宮成而主未入遇災而哭何禮哉宣公薨至是二十有八月緩於遷主可知矣言災則不恭之致亦自見矣此說據經為合或曰禮稱有焚其先人之室則三日哭新宮將以安神主也雖未遷而哭不亦可乎曰先人之室蓋嘗寢於斯食於斯會族屬於斯其居處笑語之所在皆可想也事死如事生故有焚其室則哭之禮也神主未遷而哭於人情何居

乙亥葬宋文公

按左氏文公卒始厚葬益車馬重器備君子謂華元樂舉於是乎不臣考於經未有以驗

其厚也數其葬之月則信然矣天子七月諸侯五月大夫三月士踰月以降殺遲速為禮之節不可亂也文公之卒國家安靖外無危難曷為越禮踰時逮乎七月而後克襄事哉故知華元樂舉之棄君於惡而益其後無疑矣夫禮之厚薄稱人情而為之者也宋公在殯而離次出境從金革之事哀戚之情忘矣顧欲厚葬其君親此非有所不忍於死者特欲誇耀淫侈無知之人耳世衰道微禮法既壞無以制其侈心至於秦漢之間窮竭民力以事丘隴其禍有不可勝言者春秋據事直書而其失自見此類是也豈不為永戒哉

夏公如晉

鄭公子去疾帥師伐許

公至自晉

宣公薨。至是三年之喪畢矣。宜入朝京師。見天子受王命。然後歸而即政可也。嗣守社稷之重。而不朝于周。以拜汶陽田之故。而往朝于晉。其行事亦悖矣。此春秋所為作也。公行多不致。其書公至自晉。何其至也。必有以也。

秋。叔孫僑如帥師圍棘。

**音註** 棘汶陽之邑。在濟北蛇丘。

按左氏取汶陽之田。棘不服。故圍之。復故地而民不聽。至於命上將用大師環其邑而攻之。何也。魯於是時初稅畝。作丘甲。稅役日益重矣。棘雖復歸故國。所以不願為之民也。歟。成公不知薄稅。斂輕力役。修德政以來之。而肆其兵力。雖得之亦必失之。

大雩。

晉郤克衛孫良夫伐虜咎如。

**音註**

虜咎如赤狄別種也。虜音

祥。咎音臯。

冬。十有一月。晉侯使荀庚來聘。

**音註**

晉來聘之始。

衛侯使孫良夫來聘。丙午。及荀庚盟。丁未。及孫

良夫盟。

**音註** 聘而遂盟之。於是始

劉厥曰。諸侯有聘無盟。聘禮也。盟非禮也。庚與良夫不務引其君當道。而生事專命。為非禮不信。以干先王之典。故不繫於國。以見其遂事之辱。非人臣之操。此說然也。其言及者。公與之盟。而不言公。見二卿之抗也。盟者春秋所惡。於惡之中。又有惡焉者。此類是也。

鄭伐許。

**音註** 狄鄭也。楚之伯。鄭為之也。由齊桓以來。爭鄭于楚。桓公卒。鄭始朝楚。

諸夏之變於夷。鄭為亂階也。至辰陵。鄭帥諸夏而事楚矣。敗晉於郟。盟十四國之君大夫於蜀。

皆鄭為之是故狄秦而後狄  
鄭微秦鄭則中國無左衽矣

稱國以伐狄之也晉楚爭鄭鄭兩事焉及邲  
之敗於是乎專意事楚不通中華晉雖加兵  
終莫之聽也至此一歲而再伐許甚矣夫利  
在中國則從中國利在夷狄則從夷狄而不  
擇於義之可否以為去就其所以異於夷者  
幾希况又馮弱犯寡一歲之中而再動于戈  
於鄰國不既甚乎春秋之法中國而夷狄行  
者則狄之所以懲惡也以為告辭畧而從告  
乃實錄耳一字為  
褒貶義安在也

甲定王二年  
四年 晉景十三齊頃十二衛定二蔡  
戊十年 景五鄭襄十八卒曹宣八陳成

十二杞桓五十宋共  
二秦桓十八楚共四

春宋公使華元來聘音註

宋始聘魯

三月壬申鄭伯堅卒音註

襄公卒葬公費立

杞伯來朝

夏四月甲寅臧孫許卒

公如晉

葬鄭襄公

秋公至自晉

冬城鄆音註

鄆魯西邑音運

鄭伯伐許

前此鄭襄公伐許既狄之矣今悼公又伐許  
乃復稱爵何也喪未踰年以吉禮從金革之

事則忘親矣稱爵非美詞所以著其惡也

**乙**定王二十五年晉景十四齊頃十三衛定三

亥一年崩蔡景六鄭悼公費元年曹宣

九陳成十三杞桓五十一宋共三秦桓十九楚共五

**春王正月杞叔姬來歸**

**音註**叔姬魯僖公次女

前書杞伯來朝左氏以為歸叔姬也此書杞叔姬來歸則出也春秋於內女其歸其出錄之詳者男女居室人之大倫也男子室而願為之有室女子生而願為之有家父母之心人皆有之而不能為之擇家與室則夫婦之道苦淫僻之罪多矣王法所重人倫之本錄之詳也為世戒也

**仲孫蔑如宋**

**音註**仲孫蔑孟獻子也

**夏叔孫僑如會晉荀首于穀**

**音註**穀齊地

**梁山崩**

**音註**梁山在馮翊夏陽縣北

梁山韓國也詩云奕奕梁山韓侯受命而謂之韓奕者言奕然高大為韓國之鎮也後為晉所滅而大夫韓氏以為邑焉書而不繫國者為天下記異是以不言晉也左氏載絳人之語於禮文備矣而未記其實也夫降服乘纓微樂出次祝幣史辭六者禮之文也古之遭變異而外為此文者必有恐懼修省之心主於內若成湯以六事檢身高宗克正厥事宣王側身修行欲銷去之是也徒舉其文而無實以先之何足以弭災變乎夫國主山川至於崩竭當時諸侯未聞有戒心而修德也故自是而後六十年間弑君十有四亡國三十二其應亦懔矣春秋不明著其事應而事應具存其可忽諸

秋大水

冬十有一月巳酉天王崩

**音註**

定王崩子簡王立

十有二月巳丑公會晉侯齊侯宋公衛侯鄭伯

曹伯邾子杞伯同盟于蟲牢

**音註**

蟲牢鄭地在陳留封丘縣

北

按左氏許靈公愬鄭伯于楚鄭伯如楚訟不勝歸而請成于晉盟于蟲牢鄭服也鄭服則何以書同盟天王崩赴告巳及在諸侯之策矣以所聞先後而奔喪禮也而九國諸侯會盟不廢故特書同盟以見其皆不臣春秋惡盟誓於惡之中又有惡焉者此類是也

丙簡王六年

晉景十五齊頃十四衛定四蔡景七鄭悼二卒曹宣十陳成十四杞

桓五十二宋共四秦桓二十楚共六吳子壽夢元年

春正正月公至自會

二月辛巳立武宮

武宮武公之宮立武宮非禮也喪事即遠有進而無退官廟即遠有毀而無立故二昭二穆與太祖而五者諸侯之廟制也曰考廟曰王考廟曰皇考廟皆有祭焉曰顯考廟曰祖考廟享嘗乃止去祖為壇去壇為墀壇墀有禱則祭無禱乃止去墀為鬼諸侯之祭法也武公至是歷世十一其毀巳久而輒立焉非即遠有終之意故特書曰立立者不宜立也

**音註**

墀音善

**取鄭音註**

鄭附庸國音專

鄆微國也。書取者滅之也。滅而書取爲君隱也。項亦國也。其書滅者以僖公在會。季孫所爲。故直書其事而不隱。此春秋尊君抑臣以辨上下。謹於微之意也。人倫之際。差之毫釐。繆以千里。故仲尼特立此義。以示後世。臣子使以道事君。而無朋附權臣之惡。於傳有之。犯上干主。其罪可救。乖忤貴臣。禍在不測。故臣子多不憚人主。而畏權臣。如漢谷永之徒。直攻成帝。不以爲嫌。至於王氏。則周旋相比。結爲死黨。而人主不之覺。此世世之公患也。歸父家遣緣季氏也。朝吳出奔。因無極也。王章殺身。忤王鳳也。鄴侯寄館。避元載也。惟殺生在下。而人主失其柄也。是以黨與衆多。知有權臣。而不知有君父矣。使春秋之義得行。尊君抑臣。以辨上下。每謹於微。豈有此患乎。

### 衛孫良夫帥師侵宋

### 夏六月邾子來朝

### 公孫嬰齊如晉音註

### 壬申鄭伯費卒音註

### 秋仲孫蔑叔孫僑如帥師侵宋

魯遣二卿爲主將。動大衆焉。有事於宋。而以侵書者。潛師侵掠。無名之意。蓋陋之也。於衛孫良夫亦然。上三年嘗會宋衛同伐鄭矣。次年宋使華元來聘。通嗣君矣。又次年魯使仲孫蔑報華元矣。是年冬鄭伯背楚求成于晉。而魯衛與宋又同盟于蟲牢矣。今而有所事於宋。上卿受鉞。大衆就行。而師出無名。可乎。故特書侵以罪之也。左氏載此師。晉命也。後二年宋來納幣。請伯姬焉。則此師爲晉而舉。非魯志明矣。兵戎有國之重事。邦交人道之大

倫聽命於人。不得已焉。將能立乎。春秋所以罪之也。

楚公子嬰齊帥師伐鄭

**音註**

楚始書大夫將自是必圍滅而後貶人之

冬。季孫行父如晉

晉欒書帥師救鄭

荆楚僭號稱王。聖人比諸夷狄而不赦者。大一統以存周。使民著於君臣之義也。鄭能背夷即華。是改過遷善。出幽谷而遷喬木也。嬰齊為是帥師。又因其喪而伐之。不義甚矣。經所以深惡之也。書卿帥師伐鄭。於文無貶辭。何以知其深惡楚也。下書欒武子帥師救鄭。則知之矣。凡書救者。未有不善之也。而伐者之罪著矣。按左氏。晉楚遇于桑隧。軍帥之欲戰者八人。武子遂還。則無功也。亦何善之有。曰。此春秋之所以善欒書也。兩軍相加。兵刃

既接。折馘執俘。計功受賞。此非仁人之心。王者之事故。舞干而苗格者。舜也。因壘而崇降者。文也。次于陘而風完服者。齊桓也。會于蕭魚而鄭不叛者。晉悼也。武子之能不遷戮而知還也。亦庶幾哉。

**丁**簡王七年

晉景十六。齊頃十五。衛定五。蔡景八。鄭成公。踰元年。曹宣十一。陳成

十五年。杞桓五十三。宋共五。秦桓二十。一。楚共七。吳壽夢二。

春。王正月。麇鼠食郊牛角。改卜牛。麇鼠又食其

角。乃免牛

**音註**

麇音

穀梁子曰。郊牛日展。解角而知傷。展道盡矣。其所以備災之道不盡也。改卜牛。麇鼠又食其角。則立乎人矣。非人之所能也。所以免有司之過也。有司免過。即變異也。其應云何。許



翰曰小害大下賊上食而又食三桓子孫相繼之象也宣公有虞三桓之志至成始弗戒矣理或然也音註解音球

吳伐鄭音註

鄭音談

稱國以伐狄之也吳本太伯之後以族屬言則周之伯父也何以狄之為其僭天子之大號也按國語云命圭有命固曰吳伯不曰吳王然則吳本伯爵也後雖益熾浸與中國會盟進而書爵不過曰子亦不以本爵與之故記於禮書曰四夷雖大皆曰子此春秋之法仲尼之制也而以為不敢擅進退諸侯亂名實者誤矣

夏五月曹伯來朝

不郊猶三望

吳郡朱長文曰禮天子有四望諸侯則祭境內山川而已魯當祭泰山泰山魯之境也禮所得祭故不書三望僭天子禮是以書之其說是矣楚子軫言三代命祀祭不越望而曰江漢沮漳楚之望非也楚始受封濱江之國漢水沮漳豈其境內哉此亦據後世并兼封畧言之爾音註朱長文按宋鑑紹興間人著春秋通志二十卷

秋楚公子嬰齊帥師伐鄭公會晉侯齊侯宋公

衛侯曹伯莒子邾子杞伯救鄭八月戊辰同盟

于馬陵音註

馬陵衛地

楚人軍旅數起頻年伐鄭以其背已而從諸夏也與莊之欲討微舒而入陳亦異矣書大夫之名氏書帥師書伐而無貶詞者所謂不待貶絕而罪自見者也晉合八國之君親往

救鄭則攘夷狄安中國之師也欲著其善故特書救鄭以美之言救則楚罪益明而鄭能皆夷即華善亦著矣前此晉遣上將諸國不與焉此則其君自行而會合諸國則楚人暴橫憑陵諸夏之勢益張亦可見矣故盟于馬陵而書同盟者同病楚也

公至自會

吳人州來音註

州來楚邑吳楚交兵不書至是始書之傳曰是以始太通集於

上國晉人為之也

冬大雩

衛孫林父出奔晉

春秋卷之二十

成公下

戊簡王八年 晉景十七齊頃十六衛定六蔡景寅三年 九鄭成二曹宣十二陳成十六杞桓五十四宋共六秦桓二

十二楚共八吳壽夢三

春晉侯使韓穿來言汶陽之田歸之于齊

汶陽之田本魯田也魯人恃大國之威以兵力脅齊得其故地而不正疆理於天王則取之不以其道也卻克戰勝令於齊曰反魯衛之侵地齊既從之今復有命俾歸諸齊則歸之不以其道也而齊人貪得晉有二命穿也列卿無所諫止皆罪也來言者緩詞也歸之于者易詞也為國以禮者無憚於強而魯侯微弱遂以歸齊而不能保罪亦見矣

晉欒書帥師侵蔡

公孫嬰齊如莒

宋公使華元來聘

夏宋公使公孫壽來納幣

**音註** 公孫壽蕩意諸之流

納幣不書此何以書公孫壽卿也納幣使卿非禮也禮不可畧亦不可過惟其稱而已矣畧則輕大倫過則溺私愛宋公之請伯姬魯侯之嫁其女皆致其厚者也而不知越禮逾制豈所以重大婚之禮哉經悉書之為後法也

晉殺其大夫趙同趙括

按左氏趙莊姬為趙嬰之亡譖于晉侯曰原屏將為亂欒郤為徵晉討趙同趙括以其出

與祁奚韓厥言於君曰成季之勳宣孟之忠而無後為善者懼矣乃立武而反其田然則同括無罪為莊姬所譖而欒郤害之也故稱國以殺而不去其官以見晉之失政刑矣

秋七月天子使召伯來賜公命

**音註** 召音邵賜命止此

諸侯嗣立而入見則有賜已修聘禮而來朝則有賜能敵王所愾而獻功則有賜成公即位服喪已畢而不入見既更五服一朝之歲矣而不入見京師又未嘗敵王所愾而有功也何為來賜命乎召伯者縣內諸侯為王卿士者也來賜公命罪那君之不王譏天子之僭賞也臨諸侯曰天王君天下曰天子蓋一人之通稱

冬十月癸卯杞叔姬卒

晉侯使士燮來聘叔孫僑如會晉士燮齊人邾

人伐邾

按左氏士燮來聘言伐邾也以其事吳故公請緩師不可吳初伐邾季孫固曰中國不振旅蠻夷入伐而莫之或恤亡無日矣當其時既不能救及其既成豈獲已也而又率諸國伐之何義乎前書來聘下書會伐晉侯之為盟主可見矣魯既知其不可從大國之令而不敢違其不能立亦可知矣

衛人來媵音註

為伯姬歸宋也媵音孕又音佞

媵者何諸侯有三歸嫡夫人行則姪娣從二國來媵亦以姪娣從凡一娶九女所以廣繼嗣三國來媵非禮也夫以禮制欲則治以欲敗禮則亂而諸侯一娶十有二女則是以欲敗禮矣備書三國以明逾制為後戒也

巳簡王九年

晉景十入齊頃十七卒衛定七蔡景十鄭成三曹宣十三陳成十七

杞桓五十五宋共七秦桓二十三楚共九吳壽夢四

春王正月杞伯來逆叔姬之喪以歸

凡筆於經者皆經邦大訓也杞叔姬一女子爾而四書于策何也有男女然後有夫婦有夫婦然後有父子故春秋慎男女之配重大昏之禮以是為人倫之本也事有大於此者乎男而賢也得淑女以為配則自家刑國可以移風俗女而賢也得君子以為歸則承宗廟奉祭祀能化天下以婦道豈曰小補之哉夷攻杞叔姬之行雖賢不若宋共姬亦不至如鄆季姬之越禮也杞伯初來朝魯然後出之卒而復逆其喪以歸者豈非叔姬本不應出故魯人得以義責之使復歸葬乎魯在春秋時內女之歸不得其所者有矣聖人詳錄

其始卒欲為後鑒使得有終而無弊也其經世之慮遠矣

公會晉侯齊侯宋公衛侯鄭伯曹伯莒子杞伯

同盟于蒲音註

蒲衛地

按左氏為歸汶陽之田故諸侯貳於晉晉人懼會于蒲以尋馬陵之盟夫盟非固結之本也衛獻公言於甯喜求復國喜曰必子鮮在不然必敗小邾射以句繹來奔曰使季路要我吾無盟夫信在言前者不言而自喻誠在令外者不令而自行晉初下令於齊反魯衛之侵地而齊不敢違者以其順也齊既從之魯君親往拜其賜矣復有二命俾歸諸齊一與一奪信不可知無惑乎諸侯之解體也晉人不知反求諸已悖信明義以補前行之愆而又欲刑牲歃血要質鬼神以御之是從事於末而不知本矣特書同盟以罪晉也

公至自會

二月伯姬歸于宋

夏季孫行父如宋致女晉人來媵

致女者何女既嫁三月而廟見則成婦矣而後父母使人安之故謂之致也常事爾何以書致女使卿非禮也經有因褒以見貶者初獻六羽之類是也亦有因貶以見褒者致女來媵之類是也伯姬賢行著于家故致女使卿特厚其嫁遣之禮賢名聞于遠故諸國爭勝信其無妬忌之行程氏以為一女子之賢尚聞於諸侯况君子哉或曰魯女雖賢豈能聞於遠乎曰古者庶女與非敵者則求為媵固為之擇賢小君則諸侯之賢女自當聞矣

秋七月丙子齊侯無野卒音註

頃公卒子靈公環立

晉人執鄭伯晉欒書帥師伐鄭

按左氏楚人以重賂求鄭鄭伯會公子成于鄧秋鄭伯如晉晉人討其貳於楚執諸鞶鞶欒書伐鄭鄭使伯蠲行成晉人殺之楚子重侵陳以救鄭稱人而執者既不以王命又不歸諸京師則非伯討也殺伯蠲不書者既執其召矣則行人為輕亦不足紀也楚子重侵陳與處父救江何異削而不書者鄭亦有罪焉耳夫背夷即華正也今以重賂故又與楚會則是惟利之從而不要諸義也故鄭無可救之善楚不得有能救之名

冬十有一月葬齊頃公

楚公子嬰齊帥師伐莒庚申莒潰楚人入鄆音

**註** 鄆莒別邑也○伐稱名入稱人書法與會蜀盟蜀同

按左氏楚子重自陳伐莒圍渠丘城惡衆潰楚師圍莒莒城亦惡庚申莒潰楚遂入鄆孟子曰鑿斯池也築斯城也與民守之效死而民不去是則可為也夫鑿池築城者為國之備所謂事也效死而民不去為國之本所謂政也莒恃其陋不修城郭浹辰之間楚克其三都信無備矣然兵至而民逃其上不能使民效死而不去則昧於為國之本也雖隆莒之城何益乎故經於莒潰特書日以謹之者以明城郭溝池重門擊柝皆守邦之末務必以固本安民為政之急耳

秦人白狄伐晉

經所謹者華夷之辨也晉嘗與白狄伐秦秦亦與白狄伐晉族類不復分矣其稱人貶詞也武王伐商誓師牧野庸蜀羌髡微盧彭濮皆與焉豈亦不謹乎除天下之殘賊而出民

於水火之中雖蠻夷戎狄以義驅之可也亦慮其同惡相濟貽患於後也中國友邦自相侵伐已為不義又與非我族類者共焉不亦甚乎晉既失信復聽婦人讒說殺其世臣而諸侯皆貳秦狄交伐比事以觀可謂深切著明矣

### 鄭人圍許

### 城中城音註

中城者郭之內而宮之外也

經世安民視道之得失不倚城郭溝池以為固也穀梁子謂凡城之誌皆譏其說是矣昔雖恃陋不設備至使楚人入郢苟有令政使民效死而不潰寇亦豈能入也城非春秋所貴而書城中城其為微守益微矣王公設險以守其國非歟曰百雉之城七里之郭設險之大端也謹於禮以為國辨尊卑分貴賤明等威異物采芘所以杜絕陵僭限隔上下者

乃體險之大用也獨城郭溝池之足恃乎

庚簡王十年 晉景十九卒齊靈公環元年衛定辰五年 八蔡景十一鄭成四曹宣十四陳

成十八杞桓五十六宋共八秦桓二十四楚共十吳壽夢五

### 春衛侯之弟黑背帥師侵鄭

按左氏衛子叔黑背侵鄭晉命也其曰衛侯之弟者子叔黑背生公孫剽孫林父甯殖出衛侯衍而立剽亦以父有寵愛之私故得立耳此與齊之夷仲年無異其特書弟以為後戒可謂深切著明矣

夏四月五十郊不從乃不郊

五月公會晉侯 齊侯 宋公 衛侯 曹伯

宣  
伐鄭

齊人來媵

**音註** 伯姬也，異姓來媵，非禮也。

丙午，晉侯孺卒

**音註** 景公卒，太子州蒲五月先立，以伐鄭，孺乃侯反。

秋七月，公如晉

此葬晉侯也，而不書諱之也，天子之喪動天下，屬諸侯，諸侯之喪動通國，屬大夫，公之葬晉侯，非禮也，唯天子之事焉，可也，傳以晉人止公送葬，諸侯莫在焉，魯人辱之，故諱而不書，非矣，假令諸侯皆在，魯人，不以爲辱，而可書乎。

冬十月

**辛簡王** 十有一年

晉厲公州蒲元年，齊靈二，衛定九，蔡景十二，鄭成五，曹宣

十五，陳成十九，杞桓五十七，宋共九，秦桓二十五，楚共十一，吳壽夢六。

春王三月，公至自晉

晉侯使卻犇來聘，己丑，及卻犇盟

**音註** 犇，尺牛反。

夏季，孫行父如晉

秋，叔孫僑如如齊

冬十月

**壬簡王** 十有二年

晉厲二，齊靈三，衛定十，蔡景十三，鄭成六，曹宣十六，陳成

二十，杞桓五十八，宋共十，秦桓二十六，楚共十二，吳壽夢七。

春，周公出奔晉

**音註** 周公，天子三公也。



按左氏周公楚惡惠襄之偏且與伯與爭政不勝怒而出王使劉子復之盟于鄆而入三日復出奔晉夫人主無誠慤之心而下要大臣盟是謂君不君人臣無忠信之實而上與人主盟是謂臣不臣既已要質鬼神以入矣又叛盟失信而出奔則是自絕於天也自周無出而書曰出者見周室衰微刑政號令不行於天下爾

夏公會晉侯衛侯于瑣澤

**音註**瑣澤地闕公羊作沙澤○此晉

楚為成也於是晉士燮會楚公子罷許偃盟於宋西門之外不書存中國也

秋晉人敗狄于交剛

**音註**交剛狄地

冬十月

癸未八年 十有三年

晉厲三齊靈四衛定十一蔡景十四鄭成七曹宣十七蔡

陳成二十一杞桓五十九宋共十一秦桓二十七楚共十三吳壽夢八

春晉侯使卻錡來乞師

**音註**錡魚綺反

晉主夏盟行使諸侯徵會討貳誰敢不從以霸王之尊而書曰乞師何也列國疏封雖有大小土地甲兵受之天子不相統屬晉兵非晉所得專也今晉不以王命與諸侯之師故特書曰乞以見其卑伏屈損無自反而縮之意矣聖人作春秋無不重內而輕外至於乞師則內外同辭者蓋皆有報怨復讎貪得之心是以如此若夫誅亂臣討賊子請於大王以大義驅之誰不拱手以聽命何至於乞哉噫此聖人所以垂戒後世見諸行事之深切著明者也

三月公如京師

夏五月公自京師遂會晉侯齊侯宋公衛侯鄭伯曹伯邾人滕人伐秦

諸侯每歲侵伐四出未有能修朝覲之禮者今公欲會伐秦道自王都不可越天子而往也故皆朝王而不能成朝禮書曰如京師見諸侯之慢也因會伐而行矣又書公自京師以伐秦為遂事者此仲尼親筆明朝王為重存人臣之禮也古者諸侯即位喪服畢則朝小聘大聘終則朝巡狩于方嶽則朝觀春秋所載天王遣使者屢矣十二公之述職蓋闕如也獨此年書公如京師又不能成朝禮不敬莫大焉君臣人道之大倫而至於此極故仲尼嘗喟然嘆曰夷狄之有君不如諸夏之亡也為此懼作春秋或抑或縱或予或奪所以明君臣之義者至矣其義得行則臣必敬於君子必敬於父天理必存人欲必消大倫

必正豈曰小補之哉此以伐秦為遂事之意也

曹伯廬卒于師

音註 宣公卒成公負芻也

秋七月公至自伐秦

冬葬曹宣公

甲簡王申九年

十有四年

晉厲四齊靈五衛定十二卒蔡景十五鄭成八曹成公負芻元年陳成二十二杞桓六十宋共十一秦桓二十八卒楚共十四吳壽夢九

春王正月莒子朱卒

音註 渠丘公卒黎比公密州立

夏衛孫林父自晉歸于衛

秋叔孫僑如如齊逆女

鄭公子喜帥師伐許

九月僑如以夫人婦姜氏至自齊音註婦姜氏有姑之

常稱也若妾姑則不書氏是故有成風則出姜不氏有敬嬴則穆姜不氏所以別嫡姑也

穀梁曰大夫不以夫人以夫人非正也刺不親迎也僑如之不氏一事而再見者卒名耳

然則娶於他邦而道里或遠必親迎乎以封壤則有小大以爵次則有尊卑以道途則有遠邇或迎之於其國或迎之於境

上或迎之於所館中禮之節可也

冬十月庚寅衛侯臧卒音註定公卒子獻公衍立

秦伯卒音註桓公卒子景公立

乙簡王十有五年音註晉厲五齊靈六衛獻公衍立西十年年蔡景十六鄭成七曹成二

陳成二十三杞桓六十一宋共十三卒秦景公元年楚共十五吳壽夢十

春王二月葬衛定公

三月乙巳仲嬰齊卒

嬰齊者公子遂之子公孫歸父之弟也歸父出奔齊魯人徐傷其無後也於是使嬰齊後之故書曰仲嬰齊此可謂亂昭穆之序失父子之親者以後歸父則弟不可為兄嗣以後襄仲則以父字為氏亦非矣

癸丑公會晉侯厲衛侯獻鄭伯成曹伯成宋世

子成齊國佐邾人定同盟于戚音註國佐齊大夫國武子

也

晉侯執曹伯歸于京師

音註 特書晉侯 討有罪也

稱侯以執伯討也何以爲伯討晉合諸侯伐秦曹宣公卒于師曹人使公子負芻守使公子欣時逆曹伯之喪負芻殺其太子而自立至是晉侯執之又不敢自治而歸于京師使即天刑夫是之謂伯討春秋執諸侯者衆矣未有執得其罪如此者故獨書其爵

公至自會

夏六月宋公固卒

音註 其公卒子平公成立

楚子伐鄭

秋八月庚辰葬宋共公

宋華元出奔晉宋華元自晉歸于宋宋殺其大

夫山宋魚石出奔楚

音註 宋殺其大夫山此蕩澤稱國以殺而山不

書氏有司法守之辭也魚石公子目夷曾孫

宋太卿魚氏蕩氏向氏鱗氏皆桓族也華氏戴族也華元爲右師魚石爲左師蕩氏汰而驕共公卒已葬蕩澤弱公室殺公子肥華元曰我司君臣之訓而不能正罪大矣不能治官敢賴寵乎乃出奔晉魚石將止之魚府曰元反必討是無桓氏也石曰彼多大勳國人所與不反懼桓氏之無祀於宋也遂自止元於河上元歸使國人攻桓氏殺蕩山出魚石國然後定元之出奔晉與歸於宋皆不省文者著其正也書之重詞之複必有美惡焉詞繁而不殺所以與之也以不賴寵而出奔以國人與晉皆許之討而後入正可知矣蘇轍謂使元懷祿顧寵重於出奔則不能討此說是也山不書氏背其族也背其族者伐其本

也。人而無本人道絕矣。葛藟猶能  
其本根。況於人而忍伐其本乎。

冬十有一月。叔孫僑如會晉士燮齊高無咎宋

華元衛孫林父鄭公子鱣邾人會吳于鍾離音

註鱣音秋。鍾離楚邑。淮南縣。此會吳之始。亦晉  
以諸侯之大夫會吳之始。○自是大夫自為

會矣。

吳以號舉夷之也。會而殊會外之也。殊會有  
二義。會王世子于首止。意在尊王室。不敢與  
世子抗也。會吳于鍾離。于桓于向。意在賤夷  
狄。而罪諸侯不敢與之敵也。夫以太伯至德  
是始有吳。以族言之。則周之伯父也。至其後  
世。遂以號舉者。以其僭竊稱王。不能居中國  
之爵號耳。成襄之間。中國無霸。齊晉大國。亦  
皆僂首東向。而親吳。聖人蓋傷之。故特殊會

可謂深切  
著明矣

許遷于葉音註

葉近楚之邑。音攝。今南陽葉縣是也。

丙簡王十  
一年

十有六年

晉厲六。齊靈七。衛獻二。蔡景十七。鄭成十。曹成三。陳

成二十四。杞桓六十二。宋平公成元  
年。秦景二。楚共十六。吳壽夢十一

春。王正月。雨。木冰。

雨木冰者。雨而木冰也。何休曰。木者少陽。幼  
君大臣之象。冰者凝陰。兵之類也。冰脅木者。  
君臣將執於兵之徵。未幾而有沙隨茗丘之  
事。天人之際。休咎之應焉。可誣也。而欲盡廢  
五行傳。亦過矣。

夏四月。辛未。滕子卒音註

文公卒。成公原立。

鄭公子喜帥師侵宋

音註 喜即子罕

六月丙寅朔日有食之

晉侯使欒黶來乞師

音註 黶音黶

甲午晦晉侯及楚子鄭伯戰于鄢陵楚子鄭師

敗績

音註 鄢陵

不書師敗績以其君親集矢於目而身傷爲重也當是時兩軍相抗未有勝負之形晉之捷也亦幸焉爾幸非持勝之道范文子所以立於軍門有聖人能內外無患蓋釋楚以爲外懼之戒乎楚師雖敗其勢益張晉遂怠矣卒有欒氏之譖而誅三郤國內大亂聖人備書以見行事之深誠著明也

楚殺其大夫公子側

秋公會晉侯齊侯衛侯宋華元邾人于沙隨不

見公

音註 沙隨宋地

臣子之於君父揚其美不揚其惡爲尊者諱爲親者諱禮也聖人假魯史以示王法其於魯事有君臣之義故君弑則書薨易地則書假滅國則書取出奔則書孫屈已而與強國之大夫盟則書及叛盟失信而莫適守則沒公而書會凡此類雖不沒其實示天下之公必隱避其辭以存臣子之禮然則沙隨之會晉不見公是魯侯之大辱深可恥焉者矣曷爲直書其事而不諱乎曰春秋伸道不伸邪榮義不榮勢正已而無恤乎人以仁禮存心而不憂橫逆之至者也沙隨之會魯有內難師出後期所當恤者晉人聽叔孫僑如之譖

怒公而不見曲在晉矣。魯侯自反，非有背仁棄禮不忠之咎也。昔曾子嘗聞大勇於夫子，曰：自反而縮，雖千萬人吾往矣。孟子言浩然之氣，至大至剛，以直養而無害，則塞乎天地之間，沙隨之不見於公，何歉乎？直書而不諱者，示天下後世，使知大勇浩然之氣，所以守身應物如此。其音註：橫去聲，難萬旦反，背音佩，應於證反。

公至自會

公會尹子晉侯齊國佐邾人伐鄭

**音註** 尹子周卿士子

爵也於是始以王臣與伐

曹伯歸自京師

曹伯不名其位未嘗絕也不絕其位所以累乎天王也其言自京師王命也言天王之釋

有罪也善不蒙賞惡不即刑以堯為君舜為臣雖得天下不能一朝居也負芻殺世子而自立不能因晉之執寘諸刑典而使復國則無以為天下之共主矣

九月晉人執季孫行父舍之于茗丘

**音註** 茗丘晉地

茗音條

冬十月乙亥叔孫僑如出奔齊

十有二月乙丑季孫行父及晉郤犢盟于扈

**音註** 許魯平故盟

公至自會

乙酉刺公子偃

按左氏宣伯通於穆姜欲去季孟而取其室戰于鄆陵之日公將行穆姜送公而使逐二子公以晉難告曰請反而聽命姜怒公子偃公子鉏趨過指之曰女不可是皆君也公待于壞墮申宮徹備設守而後行是以後使孟獻子守於公宮宣伯使告卻犢曰魯侯待于壞墮以待勝者卻犢取貨於宣伯而訴公於晉侯晉侯不見公公會諸侯伐鄭將行姜又命公如初公又申守而行宣伯使告卻犢曰魯之有季孟猶晉之有欒范也政令於是乎成今其謀曰晉政多門不可從也寧事齊楚有亡而已蔑從晉矣若欲得志於魯請止行父而殺之我斃蔑也不然歸必叛晉人執季文子于茗丘公還待于鄆使子叔聲伯請季孫于晉卻犢曰苟去仲孫蔑而止季孫行父吾與子國親於公室對曰倘如之情子必聞之矣若去蔑與行父是大棄魯國而罪寡君也若猶不棄使寡君得事晉君則夫二人者

魯國社稷之臣也若朝亡之魯必夕亡范文子謂欒武子曰季孫于魯相二君矣妾不衣帛馬不食粟可不謂忠乎信讒慝而棄忠良若諸侯何乃許魯平赦季孫出叔孫僑如而盟之季孫及卻犢盟

**音註**

還音旋

丁簡王十

亥二年 十有七年

晉厲七齊靈八衛獻三蔡景十八鄭成十一曹成四

陳成二十五杞桓六十三宋平二秦景三楚共十七吳壽夢十二

春衛北宮括帥師侵鄭

**音註** 北宮括衛成公會孫

夏公會尹子單子晉侯齊侯宋公衛侯曹伯邾

人伐鄭

六月乙酉同盟于柯陵

**音註** 柯陵鄭西地此言同盟尹單與盟之



辭也

秋公至自會

齊高無咎出奔莒

**音註** 高無咎齊大夫也

九月辛丑用郊

郊之不時未有甚於此者也故特曰用郊用者不宜用也或曰蓋以人饗叩其鼻血以薦也古者六畜不相為用况敢用人乎

晉侯使荀營來乞師

**音註** 荀營乙耕反

冬公會單子晉侯宋公衛侯曹伯齊人邾人伐

鄭

十有一月公至自伐鄭

壬申公孫嬰齊卒于狸脰

**音註** 狸脰地闕狸力之反張市軫反

十有二月丁巳朔日有食之

邾子矍且卒

**音註**

矍音躍且音狙○定公卒宣公輕立

晉殺其大夫卻錡卻犇卻至

楚人滅舒庸

**音註**

舒庸東夷偃姓之國

戊簡王十三年

十有八年

晉厲八弑齊靈九衛獻四蔡景十九鄭成十二曹成

五陳成二十六杞桓六十四宋平三秦景四楚共十八吳壽夢十三

春王正月晉殺其大夫胥童

庚申。晉弑其君州蒲。**音註**

厲公弑悼公周立

弑君天下之大罪。討賊天下之大刑。春秋合於人心而定罪。聖人順於天理而用刑。固不以大需釋當誅之賊。亦不以大刑加不弑之人。然趙盾以不越境而書弑。許世子止以不嘗藥而書弑。鄭歸生以憚老懼讒而書弑。楚公子比以不能效死而立而書弑。齊陳乞以廢長立幼而書弑。晉欒書身為元帥親執厲公於匠麗氏。使程滑弑公而以車一乘葬之於翼東門之外。而春秋稱國以弑其君而不著欒書之名氏。何哉。仲尼無私。與天為一。奚獨於趙盾許止歸生楚比陳乞則責之甚備。討之甚嚴。而於欒武子閻畧如此乎。學者深求其旨。知聖人誅亂臣討賊子之大要也。而後可與言春秋矣。

齊殺其大夫國佐

公如晉

夏。楚子鄭伯伐宋。宋魚石復入于彭城。**音註**

彭城

宋邑

此伐宋以納魚石。其不曰納宋魚石于彭城何也。劉敞曰。不與納也。諸侯失國。諸侯納之。正也。諸侯世也。大夫失位。諸侯納之。非正也。大夫不世也。諸侯託於諸侯禮也。大夫託於諸侯。非禮也。其言復入者。已絕而復入。惡之甚者。宋魚石。晉欒盈是矣。

公至自晉

晉侯使士匄來聘

秋。杞伯來朝

八月邾子來朝

築鹿囿音註築牆為鹿苑

巳丑公薨于路寢

冬楚人鄭人侵宋

晉侯使士魴來乞師音註魴音房

十有二月仲孫蔑會晉侯宋公衛侯邾子齊崔

杼同盟于虛音註虛打宋地打他丁反

丁未葬我君成公

春秋卷之二十一

胡安國傳附林堯叟音註括例始末

襄公上公名午成公子母定姒謚法因事有功曰襄辟土有德曰襄

周簡王十四年魯襄公元年簡王崩子靈王立襄二十八年靈王崩子景王立

鄭成公十三年魯襄公二年成公卒子僖公髡頑立襄七年僖公卒簡公嘉立

齊靈公十年魯襄公十九年靈公卒子莊公光立襄二十五年莊公弒弟景公杵臼立

宋平公四年

晉悼公復霸元年韓厥為政襄七年知罃為政襄十一年會于蕭魚服鄭襄十三年荀偃為政襄十五年悼公卒子平公彪立襄十九年

士句為政襄二十五年趙武為政襄二十七年

年、晉楚盟于宋、  
南北分霸始此、

**衛** 獻公五年、魯襄公十四年、獻公奔齊、衛立公孫剽、是為殤公、襄二十六年、殤公弒、獻復歸于衛、襄二十九年、

獻公卒、子襄公立、

**蔡** 景公二十年、魯襄公三十年、景公弒、子靈公般立、

**曹** 成公六年、魯襄公十八年、成公卒、子武公滕立、

**滕** 詳見成公元年、

**陳** 成公二十七年、魯襄公四十年、成公卒、子哀公溺立、

**杞** 桓公六十五年、魯襄公六年、桓公卒、子孝公句立、襄二十三年、孝公卒、弟文公益姑立、

**薛** 詳見僖公元年、

**莒** 犁比公五年、魯襄公十六年、晉執犁比公、襄三十一年、犁比公弒、子展輿立、

**邾** 宣公三年、魯襄公十六年、晉執宣公、襄十七年、宣公卒、悼公華立、襄十九年、晉執悼公、

**許** 靈公十八年、魯襄公二十六年、靈公卒于楚、悼公買立、

**小邾** 魯襄公七年、小邾穆公來朝、

**楚** 共王十九年、子重為令尹、魯襄公三年、子重伐吳卒、子辛為令尹、襄五年、楚殺子辛、子囊為令尹、襄十三年、共王卒、子康王昭立、襄十五年、子庚為令尹、襄二十一年、子南為令尹、

二十二年、遣子馮為令尹、襄二十五年、子木為令尹、襄二十八年、康王卒、郊敖麇立、

**秦** 景公五年、

**吳** 壽夢十四年、魯襄公十二年、壽夢卒、諸樊立、一名遏、襄二十五年、遏門于巢卒、餘祭立、一

名載襄二十九年餘祭  
卒夷末立一名餘昧

**越**

詳見隱公元年  
及昭公元年

**巳**

簡王十

**元年**

晉悼公周元年齊靈十年衛獻  
五年蔡景二十年鄭成十三年

**丑**

四年崩

**元年**

曹成六年陳成二十七年杞桓六十五年宋平  
四年秦景五年楚共十九年吳壽夢十四年

春王正月公即位

仲孫蔑會晉欒黶宋華元衛甯殖曹人莒人邾

人滕人薛人圍宋彭城

按左氏曰非宋地追書也然則書圍彭城者  
魯史舊文也曰圍宋彭城者仲尼親筆也楚  
已取彭城封魚石戊之三百乘矣則曷為繫  
之宋楚不得取之宋魚石不得受之楚雖

其地君子不登叛人所以  
正疆域固封守謹王度也

夏晉韓厥帥師伐鄭仲孫蔑會齊崔杼曹人邾

人杞人次于鄆

**音註**

鄆鄭地○書次從晉而未  
決也亦以見復伯之難

楚人釋君而臣是助事已悖矣晉於是乎降  
彭城以魚石等歸遂伐鄭而諸侯次于鄆此  
皆放於義而行者也傳書楚子辛救鄭而經  
不書者鄭本為楚以其君之故親集矢於目  
是以與楚而不貳也棄中國從蠻夷不能以  
大義裁之惟私欲之從則鄭無可救之善楚  
不得有能救之名經  
所以削之不言救也

**音註**

降平聲  
為去聲

秋楚公子壬夫帥師侵宋

九月辛酉天王崩

**音註**

簡王崩子  
靈王立

邾子來朝。

冬。衛侯使公孫剽來聘。晉侯使荀瑩來聘。**音註**

剽匹  
妙反

簡王崩。赴告已及。藏在諸侯之策矣。則宜以所聞先後而奔喪。今邾子方來修朝禮。衛侯晉侯方來修聘事。於王喪若越人視秦人之肥瘠。曾不與焉。而左氏以為禮。此何禮乎。滕定公薨。世子定為三年喪。父兄百官皆不欲。日。吾宗國魯先君莫之行也。喪紀益廢。民習於耳目而不察。故後世以日易月。人子安而行之。不知春秋之義。無君臣之禮。豈不惜哉。

**庚**靈王二年。晉悼二。齊靈十一。衛獻六。蔡景二。寅元年。鄭成十四。卒。曹成七。陳成二。

十八。杞桓六十六。宋平五。秦景六。楚共二十。吳壽夢十五。

春。王正月。葬簡王。

鄭師伐宋。

夏。五月。庚寅。夫人姜氏薨。**音註**姜氏。襄公嫡母也。

六月。庚辰。鄭伯踰卒。**音註**踰。古困反。○成公卒。子僖公髡頑立。

晉師宋師衛甯殖侵鄭。

秋。七月。仲孫蔑會晉荀瑩宋華元衛孫林父曹

人邾人于戚。

已丑。葬我小君齊姜。

叔孫豹如宋。

冬。仲孫蔑會晉荀瑩齊崔杼宋華元衛孫林父  
曹人邾人滕人薛人小邾人于戚。遂城虎牢。

虎牢鄭地故稱制邑至漢為成臯今為汜水縣巖險聞於天下猶虞之下陽趙之上黨魏之安邑燕之榆關吳之西陵蜀之漢樂地有所必據城有所必守而不可以棄焉者也有是險而不能守故不繫於鄭然則據地設險亦所貴乎天險不可升也地險山川丘陵也王公設險以守其國大易之謂也城郭溝池以為固六君子之所謹也壑斯池築斯城與民同守孟子之所以語滕君也夫狡焉思啓封疆而爭地以戰殺人盈野爭城以戰殺人盈城者固非春秋之所貴守天子之士繼先君之世不能設險守國將至於遷潰滅亡亦非聖人之所與故城虎牢而不繫於鄭程氏以為責鄭之不能有也其聖人以待衰世之

一意小康之事邪

楚殺其大夫公子申。

辛靈王三年 晉悼三齊靈十二衛獻七蔡景二卯二年 鄭僖公髡頑元年曹成八陳成二十九杞桓六十七宋平六秦景七楚共二十一吳壽夢十六

春。楚公子嬰齊帥師伐吳。**音註** 楚始伐吳

公如晉。

夏四月壬戌公及晉侯盟于長檮。**音註** 長檮晉地檮敕

居反

公至自晉。

六月公會單子晉侯悼宋公平衛侯獻鄭伯僖

莒子犁邾子宣齊世子光已未同盟于雞澤音

**註**雞澤衛地

同盟或以為有三例一則王臣預盟而書同二則諸侯同欲而書同三則惡其反覆而書同夫惡其反覆與諸侯同欲而書同信矣土臣預盟而書同義則未安盟于女栗及蘇子也而不書同盟于洮于翟泉會王人也而不書同然則此三盟者正所謂諸侯同欲而書同盟也其同欲奈何同病楚也會于柯陵之歲夏伐鄭楚人師于首止而諸侯還冬伐鄭楚人師于汝上而諸侯還雞澤之盟陳袁僑如會楚師如繁陽而韓獻子懼平丘之行楚棄疾立復封陳蔡而中國恐是知此三盟者諸侯皆有戒心而修盟故稱同不以尹子單

一劉子亦預此盟而譏之也夫王臣將命必信明義而後可以表正乎天下諸侯守邦必尊王奉法而後可以保其社稷今王臣下與諸侯約誓諸侯亦敢上與王臣要言斯大亂之道也則亦不待音註惡去聲下同要平聲見去聲

陳侯使袁僑如會

戊寅叔孫豹及諸侯之大夫及陳袁僑盟音註

諸侯在而大夫自為盟始於此

秋公至自會

冬晉荀營帥師伐許

**王**靈王四年晉悼四齊靈十三衛獻八蔡景二十三鄭僖二曹成九陳成三十卒



杞桓六十八，宋平七，秦景八，楚共二十二，吳壽夢十七。

春王三月巳酉陳侯午卒

**音註** 成公卒子哀公溺立

午者襄公名也。孔子作春秋在哀公之世，襄公哀公之皇考也。曷不諱乎？古者死而無諡，不以名為諱。周人以諡易名，於是乎有諱禮。故孟子曰：諱名不諱姓，姓所同也，名所獨也。然禮律所載則有不諱者，天子兼帝王之道，參文質之中，而作春秋以法萬世，如公薨不地，滅國書取，出奔稱孫之類，所以放其文也。莊公名同而書同盟，僖公名申而書戊申，定公名宋而書宋人之類，所以從其實也。後世不明此義，則有以諱易人之名者，又有以諱易人之姓者。詩書則諱，臨文則諱，嫌名則諱，二名則偏諱，愚者違禮以為孝，諂者獻佞以為忠，忌諱繁，名實亂，而春秋之法不行矣。

夏叔孫豹如晉

秋七月戊子夫人嬖氏薨

**音註**

嬖氏，成公妾，襄公母，嬖，杞姓。

葬陳成公

八月辛亥葬我小君定嬖

**音註**

定，謚也。

冬公如晉

陳人圍頓

癸巳五年

晉悼五，齊靈十四，衛獻九，蔡景二十四，鄭僖三，曹成十，陳哀公溺元

年，杞桓六十九，宋平八，秦景九，楚共二十三，吳壽夢十八。

春公至自晉

夏鄭伯使公子發來聘。

叔孫豹鄆世子巫如晉。**音註**

以鄆世子魯大夫故書叔孫豹鄆

世子巫如晉

仲孫蔑衛孫林父會吳于善道。**音註**

善道吳地魯衛俱受

命於晉故不言及吳

秋大雩。

楚殺其大夫公子壬夫。

公會晉侯宋公陳侯衛侯鄭伯曹伯莒子

此邾

子<sup>宣</sup>滕子<sup>成</sup>

薛伯齊世子光吳人鄆人于戚。**音**

**註**

戚衛地。於是盟于戚。吳初與諸侯盟也。不書盟為晉諱也。吳晉之盟春秋終諱之。見哀

十三年

吳何以稱人按左氏吳子使壽越如晉請聽諸侯之好晉人將為之合諸侯使魯衛大夫會吳于善道且告會期然則戚之事乃吳人來會不為主也來會諸侯而不為主則進而稱人諸侯往與之會而主吳則貶而稱國聖人之情見矣春秋之義明矣。**音註**好聲為去聲見音現

公至自會。

冬戊陳。**音註**

戊不書惟悼公之戊陳鄭也特書之

楚公子貞帥師伐陳。

公會晉侯宋公衛侯鄭伯曹伯齊世子光救陳。  
十有二月。公至自救陳。

辛未。季孫行父卒。

甲靈王六年。晉悼六、齊靈十五、衛獻十、蔡景二、午五年、鄭僖四、曹成十一、陳哀二、杞桓七十卒、宋平九、秦景十、楚共二十四、吳壽夢十九。

春。王三月壬午。杞伯姑容卒。音註。桓公卒子。孝公刳立。

夏。宋華弱來奔。

秋。葬杞桓公。

滕子來朝。

莒人滅鄆。

穀梁子曰。莒人滅鄆。非滅也。立異姓以莅祭祀。滅亡之道也。公羊亦云。莒女有為鄆夫人者。蓋欲立其出也。或曰。鄆取莒公子為後。罪在鄆子。不在莒人。春秋應以梁亡之例而書鄆亡。不當但責莒人也。今直罪莒舍鄆。何哉。曰。莒人之以其子為鄆後。與黃歇進李園之妹於楚王。呂不韋獻邯鄲之姬與秦公子。其事雖殊。其欲滅人之祀而有其國。則一也。春秋所以釋鄆而罪莒歟。以此防民。猶有以韓謚為世嗣。昏亂紀度如郭氏者。

冬。叔孫豹如邾。

季孫宿如晉。音註。宿。行父之子。

十有二月。齊侯滅萊。音註。萊。姜姓。子爵。國於東夷。

乙靈王七年 晉悼七、齊靈十六、衛獻十一、蔡景末六年 二十六、鄭僖五、卒、曹成十二、陳哀三、杞孝公旬元年、宋平十、秦景十一、楚共二十五、吳壽夢二十、

春。鄆子來朝。音註 鄆國名，少皞氏之後，音談。

夏四月三十，郊不從，乃免牲。

小邾子來朝。

城費。音註 費，魯邑，音秘。○自城費而季氏始強。

費，季氏邑也。按左氏南遺為費宰，叔仲昭伯為隧正，欲善季氏而求媚于南遺，謂遺請城費，吾多與而役，故季氏城費。夫文子相三君，無衣帛之妾，無食粟之馬，無藏金玉，無重器備，則固忠於公室，而不顧其所食之私邑也。及行艾卒，宿之不忠，遂專魯國之政，羣小媚

之，無故勞民，妄興是役，季氏益張，其後孔子行乎季孫，三月不違，至於帥師墮費，其越禮不度可知矣。然則書城費，乃履霜堅冰之戒，強私家弱公室之萌，據事直書而義自見矣。用人不惟其賢，惟其世，豈不殆哉。

秋。季孫宿如衛。

八月。螽。

冬。十月。衛侯獻使孫林父來聘。壬戌，及孫林父盟。

楚公子貞帥師圍陳。

十有二月。公會晉侯、宋公、陳侯、衛侯、曹伯、莒子。

邾子于鄆

**音註**

鄆鄭地音委又音爲

鄭伯髡頑如會未見諸侯

丙戌卒于鄆

**音註**

髡苦

門反鄆鄭地七報反又采南反卒于鄆爲子駟所弒也僖公弒簡公嘉立

按鄭僖公三傳皆以爲弒而春秋書卒者左氏則曰以瘡疾赴也公羊則曰爲中國諱也穀梁則曰不使夷狄之民加乎中國之君也夫弒而可以僞赴又順其欲而不彰則亂臣賊子免於見討而春秋非傳信之書矣然則弒而書卒二傳以爲爲中國諱不使夷狄之民加中國之君疑得聖人之意顧習其說者未之察爾夫弒君之賊其惡不待貶絕而自見矣見弒者豈無不善之積以及其身者乎衛桓則以嫡母無寵宋殤則以亟戰疲民齊襄則以行同鳥獸鄭夷則以侮慢大臣蔡國則以淫而不父陳平國則以殺諫臣而通于

夏氏楚虔則以多行無禮奚齊則以嬖孽而國人不之君吳餘祭則以輕近刑人而晉州蒲欲盡去羣大夫而立其左右也若夫鄭僖公則異於是矣中國者禮義之所出也夷狄者禽獸之與鄰也僖公欲從諸侯會于鄆則是貴禮義爲中國之君也諸大夫欲背諸夏與荆楚則是近禽獸爲夷狄之民也以中國之君而見弒於夷狄之民豈有不善之積以及其身者乎聖人至是傷之甚懼之甚故變文而書曰鄭伯髡頑如會未見諸侯丙戌卒于鄆未見諸侯其曰如會何致其志也諸侯卒于境內不地鄆鄭邑也其曰卒于鄆見其弒而隱之也卒鄭伯逃歸陳侯聖人之旨微而公穀之義精矣存天理抑人欲之意遠矣

**音註**

瘡魚畧反爲于僞反夫音扶下同

陳侯逃歸

**音註**

自是凡會同無陳

穀梁子曰逃義曰逃逃者匹夫之事上二年諸侯戍陳今楚令尹來伐諸侯又救之亦既勤矣爲陳侯計者下令國中大申儆備立太子以固守親聽命於諸侯謀禦狄之策當是時晉君方明八卿和睦諸侯聽命必能致力於陳矣不此之顧棄儀衛而逃歸此匹夫之事耳夫義路也禮門也輕棄中國惟蠻夷之懼是不能由是路出入是門故書逃歸以罪之可謂深切著明矣

**丙**靈王八年晉悼八齊靈十七衛獻十二蔡景申七年二十七鄭簡公嘉元年曹成十三

**春**王正月公如晉

夏葬鄭僖公

鄭人侵蔡獲蔡公子燮

季孫宿會晉侯鄭伯齊人宋人衛人邾人于邢

**丘音註**

邢丘故邢國今河內平臯縣

蘇轍曰晉悼公修文襄之業改命朝聘之數使諸侯之大夫聽命於會大夫稱人衆辭也朝聘之節儉而有禮衆之所安也臣則以爲大夫稱人貶之也昔周公戒成王以繼自今我其立政立事夫不自爲政而委於臣下是以國之利器示人而不知寶也朝聘事之大者重煩諸侯而使大夫聽命無乃以姑息愛人而不由德乎使政在大夫而諸侯失國又豈所以愛之也後此八年溴梁之會悼公初沒諸侯皆在而大夫獨盟君若贅旒夫豈一朝一夕之故哉故邢丘之事魯公在晉而季孫宿會見魯之失政也諸侯之大夫貶而稱

人謹其始也

公至自晉

莒人伐我東鄙

秋九月大雩

冬楚公子貞帥師伐鄭

齊宣王問於孟子交鄰國有道乎孟子曰有惟智者為能以小事大故大王事獯鬻句踐事吳以小事大畏天者也畏天者保其國鄭介大國之間困強楚之令而欲息肩於晉若能信任仁賢明其刑政經畫財賦以禮法自守而親比四鄰必能保其封境荆楚雖大何畏焉而子耳子國加兵於蔡獲公子燮無故怒楚所謂不修文德而有武功者也楚人來

討不從則力不能敵從之則晉師必至故國人皆喜而子產獨不順焉以晉楚之爭鄭自茲弗得寧矣是以獲公子燮特書侵蔡以罪之而公子貞來伐鄭及楚平不復書矣平而不書以見鄭之屈服於楚而不信也犧牲玉帛待於境上以待強者而請盟其能國乎

晉侯使士匄來聘

丁靈王九年晉悼九齊靈十八衛獻十三蔡景西八年杞孝三朱平十二秦景十三

楚共二十七吳壽夢二十二

春宋災

夏季孫宿如晉

五月辛酉夫人姜氏薨音註姜氏成公母

秋八月癸未葬我小君穆姜。

冬公會晉侯宋公衛侯曹伯莒子邾子滕子薛

伯杞伯小邾子齊世子光伐鄭十有二月己亥。

同盟于戲。

**音註**

戲鄭地音義

鄭之見伐於楚子駟欲從楚子展曰小國無信兵亂日至亡無日矣請完守以老楚杖信以待晉其策未為失也而子駟遂及楚盟於是晉師至矣諸侯伐鄭晉人令於列國修器械備盜餼糧歸老幼居疾于虎牢肆背圍鄭鄭人恐乃行成荀偃曰遂圍之以待楚人之救而與之戰不然無成知罃曰許之盟而還師以敵楚吾三分四軍與諸侯之銳以逆來者於我未病楚不能矣猶愈於戰暴骨以逞不可以爭大勞未艾君子勞心小人勞力先王

之制也乃許鄭成同盟于戲夫善為國者不師善師者不陣善陣者不戰知武子明於善陣之法以佐晉悼公屢與諸侯伐鄭楚輒救之而不與之戰楚師遂屈得善勝之道矣故下書蕭魚之會以美之

**音註**

艾魚廢反

楚子伐鄭。

**戊**靈王

**十年**

晉悼十齊靈十九衛獻十四蔡景二九鄭簡三曹成十五陳哀六

杞孝四宋平十二秦景十四楚共二十八吳壽夢二十三

春公會晉侯宋公衛侯曹伯莒子邾子滕子薛

伯杞伯小邾子齊世子光會吳于相。

**音註**

相音查楚

地。



夏五月甲午。遂滅偃陽。**音註** 偃陽，妘姓國，今彭城。傳陽縣，偃音福。

又音逼。○此通吳晉往來之道也。

公至自會。

楚公子貞、鄭公孫輒帥師伐宋。

晉師伐秦。

秋，莒人伐我東鄙。

公會晉侯、宋公、衛侯、曹伯、莒子、邾子。

齊世子光、滕子、薛伯、杞伯、小邾子伐鄭。**音**

**註** 此悼公三駕之。


冬，盜殺鄭公子騂、公子發、公孫輒。**音註** 盜，賤者也。以賤

者而曰殺三卿，鄭之失政甚矣。是故書盜自此始。

按左氏，鄭公子騂當國，發為司馬，輒為司空。騂與尉止有爭，及為田漁，司氏堵氏侯氏子師氏皆喪田，故五族聚羣不逞之徒，以作亂入西宮，殺三卿于朝，不稱大夫，程氏以為失卿職也。卿大夫者，國君之陪貳，政之本也。本強則精神折衝，聞有偃息談笑而卻敵國之兵，勝千里之難者矣。乃至於身不能保而盜得殺之於朝，安在其為陪貳乎？故削其大夫為當官失職。**音註** 喪去者之鑿也。

戊，鄭虎牢。楚公子貞帥師救鄭。**音註** 向也。曰虎

牢，何？不繫之鄭者，為天下城之也。繫之鄭者，為鄭戍之也。是故楚丘不繫之衛，緣陵不繫



之犯梁山沙鹿不繫之晉皆非一國之辭也。鄆鄆部繫之紀彭城繫之宋皆一國之辭也。○楚數救鄭矣。宣元年蔣賈二年鬬椒九年子重十年六年楚子十七年子重公子申皆不書。於是始書救鄭以爲晉悼復伯楚欲救而不能也。是故書救鄭見晉之終失陳書救鄭見楚之終失鄭爾云。

虎牢之地城不繫鄭者責在鄭也。戍而繫鄭者罪諸侯也。曷爲責鄭設險所以守國有是險而不能設犧牲玉帛待盟境上使其民人不享土利辛苦犇臨無所底告然後請成故城不繫鄭者責其不能存也。曷爲罪諸侯夫鄭人從楚固云不義然中國所以城之者非欲斷荆楚之路爲鄭蔽也。駟帥扼險以逼之爾至是伐而復戍焉。猶前志也。則可謂以義服之乎。故戍而繫鄭者若曰鄭國分地受諸天子非列國所得專所以罪諸侯也。聖人旣

### 公至自伐鄭

以虎牢還繫於鄭又書楚公子貞帥師救鄭諸侯之罪益明矣。夫以救許楚所以深罪諸侯不能保鄭肆其陵逼曾荆楚之不若也亦可謂深切著明也哉。

### 春王正月

巳靈王十有一年 晉悼十一 齊靈二十 衛獻十 亥十年 五 蔡景三十 鄭簡四 曹成十 六 陳哀七 杞孝五 宋平十四 秦景十五 楚共二十九 吳壽夢二十四

作三軍音註 此志三家分公室之始 三軍魯之舊也古者大國三軍次國二軍小國一軍魯侯封於曲阜地方數百里天下莫強焉及僖公時能復周公之字而史克作頌其詩曰公車千乘說者以爲大國之賦也又

曰公徒三萬說者以為大國之軍也故知三軍魯之舊爾然車而謂之公車則臣下無私乘也徒而謂之公徒則臣下無私民也若有侵伐諸卿更帥以出事畢則將歸於朝車復於甸甲散於丘卒還以邑將皆公家之臣兵皆公家之衆不相繫也文宣以來政在私門襄公幼弱季氏益張廢公室之三軍而三家各有其一季氏盡征焉而舊法亡矣是以謂之作其明年季孫宿救台遂入郕又其後享范獻子而公臣不能具三糶民不屬公可知矣春秋書其作舍以見昭公失國定公無正而兵權不可去公室有天下國家者之所宜鑒也

夏四月四卜郊不從乃不郊

鄭公孫舍之帥師侵宋

公會晉侯宋公平衛侯獻曹伯成齊世子光莒

子犁邾子宣滕子成薛伯杞伯小邾子伐鄭音

**註**此悼公三駕之二

秋七月己未同盟于亳城北公至自伐鄭音註

亳城鄭地亳蒲落反

楚子鄭伯伐宋

盟于亳城北鄭服而同盟也尋復從楚伐宋故書同盟見其既同而又叛也既同而又叛從子展之謀欲致晉師而後與之也故亳之盟其載書曰或問茲命明神殛之俾失其民隊命亡氏踣其國家雖淪此盟而不顧也噫慢鬼神至於此極而盟猶足恃乎音註

復扶又灰、  
見音現、

公會晉侯宋公衛侯曹伯齊世子光莒子邾子

滕子薛伯杞伯小邾子伐鄭會于蕭魚音註蕭魚

鄭地此悼公三駕之三○伐鄭會于蕭魚序續也○自是鄭不叛晉者二十四年

程氏曰會于蕭魚鄭又服而請會也不書鄭會謂其不可信也而晉悼公推至誠以待人信鄭不疑禮其因而歸焉納斥侯禁侵掠遣叔肸告于諸侯而鄭自此不復背晉者二十四年至哉誠之能感人也自悼公能謀於魏絳以息民聽於知武子而不與楚戰故三駕而楚不能與之爭雖城濮之績不越是矣

公至自會

楚人執鄭行人良霄音註即伯有公孫輒之子

冬秦人伐晉

春秋卷之二十二

襄公中

庚靈王十一年

十有二年

晉悼十二、齊靈二十一、衛獻十六、蔡景三十一、鄭簡

五、曹成十七、陳哀八、杞孝六、宋平十五、秦景十六、楚共三十、吳壽夢二十五、卒

春。王三月。莒人伐我東鄙。圍台。季孫宿帥師救

台。遂入鄆。

**音註**

台魯邑、今鄆琊費縣有台亭、音胎、又臺急反、

鄆莒地也、遂者生事也、入者逆詞也、大夫無遂事、受命而救台、不受命而入鄆、惡季孫宿之擅權、使公不得有為於其國也、或曰、古者命將、得專制闔外之事、有可以安國家利社稷者、專之可也、曰、此為境外言之也、台在邦域之中而專行之、非有無君之心者、不敢為

也昭公逐定無正夫豈一朝一夕之故哉其所由來者漸矣

夏晉侯使士魴來聘。

秋九月吳子乘卒。音註 壽夢卒子諸樊立吳始書卒

冬楚公子貞帥師侵宋。

公如晉。

辛靈王十有三年。音註 晉悼十三齊靈二十二衛獻十七蔡景三十二鄭簡

六曹成十八陳哀九杞孝七宋平十六秦景十七楚共三十一卒吳諸樊過元年

春公至自晉。

夏取郟。音註 郟小國今在城亢父縣有郟亭是已音註

秋九月庚辰楚子審卒。音註 共王卒子康王昭立

冬城防。音註 防臧氏邑

壬靈王十有四年。音註 晉悼十四齊靈二十三衛獻十八蔡景三十三鄭簡

七曹成十九陳哀十杞孝八宋平十七秦景十八楚康王昭元年吳諸樊二

春王正月季孫宿叔老會晉士匄齊人宋人

平衛人獻鄭公孫蠆曹人莒人比邾人宣滕

人成薛人杞人小邾人會吳于向。音註 莒丑邁反向鄭

地叔老聲伯子魯使二卿會晉敬事伯國晉人自是輕魯幣而益敬其使故叔老雖介亦列於會齊崔杼宋華閱衛北宮括在會惰慢不攝故貶稱人蓋欲以督率諸侯獎成伯功也吳來在

向諸侯會之

故曰會吳

使舉上客而叔老並書者以內卿行則不得不書矣季孫宿以卿為介而不使之免叔老介於宿而不敢避蓋兩失之雖晉人輕其幣而敬其使於君命使人之體豈為得哉

二月乙未朔日有食之

夏四月叔孫豹會晉荀偃齊人靈宋人平衛北

宮括鄭公孫薑曹人成莒人犁邾人宣滕人成

薛人杞人小邾人伐秦音註晉秦兵爭止此晉秦兵爭始於鞏而

終於十三國之伐

已未衛侯出奔齊音註獻公出衛人立公孫剽

按左氏衛甯殖將死語其子曰吾得罪於君名在諸侯之策曰孫林父甯殖出其君夫所謂諸侯之策則列國之史也諸侯則若晉若魯是也史則若晉之乘魯之春秋是也今春秋書衛侯出奔齊而不曰孫林父甯殖出其君者蓋仲尼筆削不因舊史之文也欲知經之大義深考舊文筆削之不同其得之矣或曰孫甯出君眾所同疾史策書之是也聖人曷為掩姦藏惡不暴其罪而以歸咎人主何哉曰臣而逐君其罪已明矣人君擅一國之名寵神之主而民之望也愛之如父母仰之如日月敬之如神明畏之如雷霆何可出也所為見逐無乃肆於民上縱其淫虐以棄天地之性乎故衛衍出奔使祝宗告亡且告無罪而定姜曰有罪若何告無春秋端本清源之書故不書所逐之臣而以自奔為名所以警乎人君者為後世鑒非聖人莫能修之為此類也



莒人侵我東鄙。

秋。楚公子貞帥師伐吳。

冬。季孫宿會晉士匄、宋華閱、衛孫林、父鄭公孫

薑、莒人邾人于戚。音註 戚孫林父邑。於是孫林父立公孫剽而會晉

于戚以定之。襄昭之際，大夫無君之禍，晉為之也。悼公之德衰矣。

癸靈王十有五年。音註 晉悼公十五年，齊靈王二十四年，衛獻公十九年，蔡

景三十四年，鄭簡公八年，曹成二十一年，陳哀十一年，杞孝九，宋平十八，秦景十九，楚康二，吳諸樊三。

春。宋公使向戌來聘。二月，己亥，及向戌盟于剡。

**音註** 劉魯地。

劉夏逆王后于齊。音註 劉夏天子大夫，劉采地，夏名也。

劉夏何以不稱使不與天子之使夏也。昏姻人倫之本，王后天下之母，劉夏士也，士而逆后，是不重人倫之本，而輕天下之母矣。然則何使卿往逆公監之禮也。官師從單靖公逆王后于齊，書劉夏而不書靖公，是知卿往逆公監之禮也。春秋昏姻得禮者常事不書。

**音註** 單音善。

夏齊侯伐我北鄙，圍成。公救成，至遇。音註 成魯地，遇地。

魯地。○書至遇，公畏齊，不敢至成。

季孫宿、叔孫豹帥師城成郛。音註 郛，成之外城也。

秋八月丁巳，日有食之。



邾人伐我南鄙。

冬十有一月癸亥晉侯周卒。

**音註**

悼公卒子平公彪立。

**甲**靈王十

十有六年

晉平公彪元年齊靈二十五年衛獻二十殤二蔡景三十

十五鄭簡九曹成二十一陳哀十二杞孝三十宋平十九秦景二十楚康三吳諸樊四

春王正月葬晉悼公。

三月公會晉侯宋公衛侯鄭伯曹伯莒子邾子

薛伯杞伯小邾子于泲梁戊寅大夫盟

**音註**

泲

名出河內軹縣東南至温入河古關反。○此伯在焉而但曰諸侯者無伯也君在焉而但曰大夫者無君也是故自文而下盟于扈會于扈則有斥言諸侯而不序自襄而下泲梁之盟則有

斥言大夫而不序。

牡丘之會諸侯既次于匡則書曰公孫敖師師及諸侯之大夫救徐雞澤之會諸侯既盟而陳侯使袁僑如會則書曰叔孫豹及諸侯之大夫及陳袁僑盟今泲梁之會諸侯皆在是若欲使大夫盟者則書魯卿及諸侯之大夫盟可也而獨書大夫何也諸侯失政大夫皆不臣也上二年春正月會于向十有四國也冬會于戚七國之大夫也此三會皆國之大事也而使大夫皆專之而諸侯皆不與焉是列國之君不自為政弗躬弗親禮樂征伐已自大夫出矣况悼公既沒晉平初立無先公之明也君若贅旒而大夫張亦宜矣夫豈一朝一夕之故哉善惡積於至微而不可掩常情忽於未兆而不預謀苟偃怒大夫盟而晉靖公廢趙籍韓虔魏斯為諸侯之勢見矣

有國者謹於禮而不敢忽音註 與去聲 見音現

此春秋以待後世之意也音註 執以歸 始此

齊侯伐我北鄙

夏公至自會

五月甲子地震

叔老會鄭伯晉荀偃衛甯殖宋人伐許音註 非鄭

主兵也則曷為會鄭伯春秋不以大夫主諸侯則推而屬之鄭也春秋之大義夷夏之辨君臣之序而已是故僖十九年盟于齊陳非主盟也不以夷狄主中國則書會陳今年伐許鄭非主兵也不以大夫主諸侯則書會鄭

秋齊伐我北鄙圍成

大雩

冬叔孫豹如晉

乙靈王十十有七年晉平二齊靈二十六衛獻二十

鄭簡十曹成二十三陳哀十三杞孝十一宋平二十秦景二十一楚康四吳諸樊五

春王二月庚午邾子貜卒音註 卒悼公華立

宋人伐陳

夏衛石買帥師伐曹音註 石買石 櫻子

秋齊侯伐我北鄙圍桃音註 桃魯地并縣 東南有桃墟

齊高厚帥師伐我北鄙。圍防。音註防，臧紇邑。伐

大夫始此。自隱以來，齊伐我皆書人君將書。君自文十五年始。大夫將書大夫。自高厚始。

九月大雩。

宋華臣出奔陳。

冬，邾人伐我南鄙。

丙靈王十有八年。晉平三，齊靈二十七，衛獻二十二年，殤四，蔡景三十七，鄭簡十一，曹成二十三，陳哀十四，杞孝十二，宋平二十一，秦景二十二，楚康五，吳諸樊六。

春，白狄來。

劉敞曰：夷狄於中國無事焉。其於天子世一見，則諸侯雖善其交際，不得而通也。是以春

秋亦不與其朝，不與其朝者，懲淫慝，一內外也。周公致太平，越裳氏重九譯而獻其白雉。公曰：君子德不及焉，不享其贄。此乃天子而讓也。況列國之君乎？守藩之臣采

夏，晉人執衛行人石買。音註石買，卽是伐曹者。宜卽懲治本罪，而

晉因其爲行人之使執之，故書行人以罪晉。

秋，齊師伐我北鄙。

冬，十月，公會晉侯、宋公、衛侯、鄭伯、曹

伯、莒子、邾子、滕子、薛伯、杞伯、小邾子同

圍齊。音註同圍齊，非但晉志也。自圍齊之後，晉師無君將，雖大夫之師出，無與於諸

復之義矣。

凡侵伐圍入，未有書同者，而獨於此書同圍齊，何也？齊環背盟棄好，陵虐神主，肆其暴橫，數伐鄰國，觀加兵於魯，則可見矣。諸侯所共惡疾，故同心而圍之也。同心圍齊，其以伐致何也？見齊環無道，宜得惡疾，大諸侯之伐，而免其圍齊之罪辭也。春秋於此，有沮橫逆抑強暴之意。孟子曰：國必自伐而後人伐之，自作孽不可追，其齊侯環之謂矣。尚誰懟哉。

音註 沮在呂反

曹伯負芻卒于師。

楚公子午帥師伐鄭。

丁靈王十未八年 十有九年 晉平四，齊靈二十八，卒衛獻二十，殤五，蔡景三十

八，鄭簡十二，曹武公，滕元年，陳哀十五，杞孝十三，宋平二十二，秦景二十三，楚康六，吳諸樊七

春王正月，諸侯盟于祝柯。音註 祝柯，齊邑，今齊州禹城縣。

晉人執邾子。

公至自伐齊。

取邾田自濼水。音註 濼水出東海合鄉縣西南，經魯國至高平湖，陸縣入

泗水，濼音郭。

季孫宿如晉。

葬曹成公。

夏，衛孫林父帥師伐齊。

秋七月辛卯，齊侯環卒。音註 靈公卒，子莊公光立。

晉士句帥師侵齊。至穀聞齊侯卒，乃還。

穀，齊地也。還者，終事之詞。占之為師，不伐喪。大夫以君命出境，有可以安國家、利社稷者，則專之可也。世衰道微，暴行交作，利人之難，以成其私欲者衆矣。士句乃有惻隱之心，聞齊侯卒而還，不亦善乎？或曰：君不尸小事，臣不專大名，為士句者宜。擘帷而歸命乎介，則非矣。使士句未出晉境，如是焉可也。已至齊地，則進退在士句矣。猶欲擘帷而歸命乎介，則非古者命將不從中覆，專制境外之意。而況喪必不可伐，非進退可疑而待請者，故至穀聞齊侯卒，乃還，善之也。

八月丙辰，仲孫蔑卒。

齊殺其大夫高厚。

鄭殺其大夫公子嘉。

按左氏：初盜殺鄭三卿於西宮之朝，公子嘉知而不言，既又欲起楚師以去諸大夫，故楚人伐鄭，至于純門而返。至是嘉之為政也專，國人患之，乃討西宮之難，與純門之師。子展子西率國人殺嘉而分其室，不稱鄭人者，嘉則有罪矣。而子展子西不能正以王法，肆諸市朝，與衆同棄，乃利其室而分之，有私意焉。故稱國以殺而不去其官，此春秋原情定罪之意。

冬葬齊靈公。

城西郭。

音註 西郭，國都外城之西郭也。

叔孫豹會晉士句于柯。

音註 柯，衛地，今魏郡內黃縣東北有柯城。

城武城音註

武城魯邑今泰山南武城縣

戊靈王十

二十年

晉平五齊莊公光元年衛獻

申九年 二十四 殤六 蔡景三十九 鄭簡十三 曹武二 陳哀十六 杞孝十四 宋平二十三 秦景二十四 楚康七 吳諸樊八

春王正月辛亥仲孫速會莒人

比

盟于向音註

何莒邑

夏六月庚申公會晉侯齊侯宋公衛侯鄭伯曹

伯莒子邾子滕子薛伯杞伯小邾子盟于澶淵

音註

澶淵衛地在頓丘縣南澶音憐

秋公至自會

仲孫速帥師伐邾

蔡殺其大夫公子燮蔡公子履出奔楚

按左氏初蔡文侯欲事晉曰先君與於踐土之盟晉不可棄且兄弟也畏楚不行而卒楚人使蔡無常公子燮求從先君以利蔡謀國之合於義者也國人乃不順焉而殺燮此何罪矣故稱國而不去其官公子履其母弟也進不能正國退不能遠害懼禍而奔從於夷狄書者罪之也

陳侯之弟黃出奔楚

叔老如齊

冬十月丙辰朔日有食之

季孫宿如宋。

巳靈王二十有一年 晉平六 齊莊二 衛獻二 西十年 十五 鳩七 蔡景四 十 鄭

簡十四 曹武三 陳哀十七 杞孝十五 宋平二十 四 秦景二十五 楚康八 吳諸樊九 是年十一月

庚子 孔子生

春王正月公如晉。

邾庶其以漆間丘來奔。音註 漆邾邑 今山陽南 平鄉有漆亭 間丘

邾邑 今山陽南平縣有間丘亭 於是公猶在晉 季孫宿納之也

庶其邾大夫也 春秋小國之大夫 不書其姓氏 微也 其以事接我 則書其姓氏 謹之也 莒慶以大夫 卽魯而鬪昏 接我不以禮者也 邾庶其以地 叛其君而來奔 接我不以義者也

以欲敗禮 則身必危 以利棄義 則國必亂 春秋禮義之大宗 故小國之大夫 接我以利 欲則特書其姓氏 謹之也 漆一邑 間丘一邑 而不言及者 庶其之私邑 所受於君而食之者也 此叛臣何以不書叛 書名書地 而竊邑叛君之罪見矣 夫棄夷狄 從諸夏 其慕義之心 疑可與也 然有據城以求援者 君子猶以爲不可受 而況鄰國乎 書來奔 而魯受叛臣納其地之罪 亦見矣

夏公至自晉。

秋晉欒盈出奔楚。

九月庚戌朔日有食之。

冬十月庚辰朔日有食之。

曹伯來朝。

公會晉侯齊侯宋公衛侯鄭伯曹伯莒子邾子

于商任音註商任地關

庚靈王二十有二年音註晉平七齊莊三衛獻二

鄭簡十五曹武四陳哀十八杞孝十六宋

春王正月公至自會。

夏四月。

秋七月辛酉叔老卒音註子叔齊

冬公會晉侯齊侯宋公衛侯鄭伯

曹伯武莒子比邾子薛伯杞伯孝小邾子于沙

隨音註沙隨宋地

按左氏會于商任錮樂氏也會于沙隨復錮樂氏也古者大夫去國君不掃其社稷不繫纍其子弟不收其田邑使人導之出疆又先之於其所往救五典厚人倫也今晉不念樂氏世勲而逐盈又將搏執之而命諸侯無得納焉則亦過也楚逐申公巫臣子反請以重幣錮之楚子曰止彼若能利國家雖重幣晉將可乎若無益於晉晉將棄之何勞錮焉其賢於商任沙隨之謀遠矣

公至自會。

楚殺其大夫公子追舒音註追舒即子南也



辛靈王二十有三年晉平八齊莊四衛獻二  
亥十二年十七殤九蔡景四十二  
鄭簡十六曹武五陳哀十九杞孝十七卒宋  
平二十六秦景二十七楚康十吳諸樊十一  
春王二月癸酉朔日有食之。

三月乙巳杞伯匄卒音註 孝公卒弟文  
公益姑立

夏邾畀我來奔。

葬杞孝公。

陳殺其大夫慶虎及慶寅。

按左氏慶虎無道求專陳國暴蔑其君畏公  
子黃之偪而愬諸楚曰與蔡司馬同謀楚人  
以為討公子黃奔楚愬之二慶以陳叛楚屈  
建圍陳殺二慶夫人君擅一國之利勢使其

臣暴蔑其身而不能遠欲去其親而不能保  
譖愬之於大國而不能辨至因夷狄之力然  
後能克則非君人之道也故二慶之死稱國  
以殺公子黃之出特以弟書者譏歸陳侯也  
凡此皆春秋音註遠去聲  
端本之意上去聲

陳侯之弟黃自楚歸于陳。

晉欒盈復入于晉入于曲沃音註 曲沃晉邑在  
河東聞喜縣

欒氏晉室之世臣故盈雖出奔猶繫於晉復  
入者甚逆之辭為其既絕而復入也曲沃者  
所食之地當是時權寵之臣各以利誘其下  
使為之用至於殺身而不避莫知有君臣之  
分者也故聞語欒孺子者則或泣或嘆以為  
得主而為之死猶不死也盈從之遂入絳乘  
公門若非天棄欒氏又有范鞅之謀晉亦殆  
矣原其失在於綱之甚急使無所容於天地



之間。是以此極。春秋備書之。以見人而不仁。疾之已甚。亂也。其為後世鑒。豈不深切著明也哉。

秋。齊侯伐衛。遂伐晉。**音註**此其書遂何。齊始伐

齊世從晉。於是始叛。則晉伯衰而諸侯貳矣。晉之衰。諸夏之憂也。

八月。叔孫豹帥師救晉。次于雍榆。**音註**雍榆。晉

郡朝歌縣東有雍榆城。雍於用反。榆一作渝。○次而後救。匿其救之之形也。救而先次。宣其救之之聲也。○自救晉而天下益多故矣。盟于宋而南北之勢成。會于申而淮夷至。戰于雞父而吳之敗者六國。於越入吳。春秋終焉。蓋於是焉始。故謹而書之也。是故自救盟主。他救皆不書。如昭二十一年。晉皆諸侯之師救宋。三十年。楚救徐之類。皆不書。以為不足書也。

巳卯。仲孫速卒。**音註**仲孫速。孟

冬。十月。乙亥。臧孫紇出奔邾。

晉人殺欒盈。

齊侯襲莒。**音註**春秋書襲者。此特筆也。

**王**靈王二十有四年。晉平九。齊莊五。衛獻二十三年。十八。殤十。蔡景四。十三。鄭簡十七。曹武六。陳哀二十。杞文益。姑元年。宋平二十七。秦景二十八。楚康十一。吳諸樊十二。

春。叔孫豹如晉。

仲孫羯帥師侵齊。

夏。楚子伐吳。

秋七月甲子朔日有食之既。

齊崔杼帥師伐莒。

大水。

八月癸巳朔日有食之。

公會晉侯平衛侯殤鄭伯簡曹伯成莒

子黎邾子悼滕子薛伯杞伯小邾子于夷儀音

註夷儀本邢地衛滅邢而為衛邑。

冬楚子蔡侯陳侯許男伐鄭。

公至自會。

陳鍼宜咎出奔楚。音註宜咎陳大夫鍼子八世孫也其後在楚為箴尹

宜咎

叔孫豹如京師。

大饑。

古者救災之政若國內荒或發廩以賑乏或移粟以通用或徙民以就食或為粥溢以救餓莩或興工作以聚失業之人緩刑舍禁弛力薄征索鬼神除盜賊弛射侯而不燕置廷道而不脩殺禮物而不備雖有旱乾水溢民無菜色所以備之者如此其至是年秋有陰沴之災而冬大饑蓋所以賑業音註舍音捨沴音戾之者有不備矣故書之以為戒

癸靈王二十有五年晉平十齊莊六弒衛獻

十四、鄭簡十八、曹武七、陳哀二十、杞文二、宋平二十八、秦景二十九、楚康十二、吳諸樊十三、卒。春，齊崔杼帥師伐我北鄙。

夏五月乙亥，齊崔杼弑其君光。

**音註**

杼音主，○莊公弑弟

景公杵曰立。

齊莊公見弑，賈舉州綽等十人皆死之，而不得以死節稱，何也？所謂死節者，以義事君，責難陳善，有所從違而不苟者是也。雖在屬車後乘，必不肯同入崔氏之宮矣。若此十人者，獨以勇力聞，皆逢君之惡，從於昏亂，而莊公嬖之者，死非其所。此諸匹夫匹婦，自經於溝瀆而莫之知者，猶不逮也。晏平仲曰：君民者，豈以陵民，社稷是主，臣君者，豈為其口實，社稷是養，故君為社稷死，則死之，為社稷亡，則亡之。若為已死而為已亡，非其私暱，誰敢任

之。此十人者，真其私暱，任此宜矣。雖殺身不償責，安得以死節許之哉。

公會晉侯宋公衛侯鄭伯曹伯莒子邾子滕子

薛伯杞伯小邾子于夷儀。

諸侯會于夷儀，將以討齊。齊使隰鉏請成，慶封如師，男女以班，賂晉侯以宗器，樂器自六正、五吏、三十帥、三軍之大夫、百官之正長，師旅及處守者，皆有賂。晉侯許之。夫晉本為報朝歌之役來討，及會夷儀，既聞崔杼之弑，則宜下令三軍建而復旆，聲於齊人，問莊公之故，執崔杼以戮之，謀於齊眾，置君以定其國。示天討之義，則方伯連帥之職修矣。今乃知賊不討而受其賂，則是與之同情也。故春秋治之如下文所貶云。

六月壬子，鄭公孫舍之帥師入陳。

秋八月己巳諸侯同盟于重丘。**音註**諸侯即夷

者重丘齊地曹州乘氏縣有重丘故城重平聲

崔杼既弑其君矣晉侯受其賂而許之成故盟于重丘特書口同

公至自會。

衛侯入于夷儀。

鄭伯突入于櫟衛侯入于夷儀其入則一或名或不名者鄭伯奪正以立而國人君之諸侯助之不知其義不可以有國也故特書其名著王法以絕之衛侯茂其冢卿失國出奔固不為無罪矣然有世叔儀以守有母弟鱄以出或撫其內或營其外有歸道焉則其義猶未絕也故止書其爵而不名及甯喜弑剽復歸于衛然後書名此聖人俟其改過遷善

不輕絕人之意曾子曰夫子之道忠恕而已此類是也

楚屈建帥師滅舒鳩。**音註**舒鳩偃姓于爵國

冬鄭公孫夏帥師伐陳。

十有二月吳子遏伐楚門于巢。**音註**遏即諸

於葛反巢吳楚間小國廬江六縣有居巢城○諸樊卒弟餘祭立

巢南國也其言門于巢卒者吳子將伐楚引師至巢入其門巢人射諸城上矢中吳子而卒非吳子之自輕而見殺也古者入境必假道過門必釋甲入國則不馳或曰古者大國過小邑小邑必飾城而請罪亦非巢之輕以一矢相加不飾城而請罪也

**甲**靈王二十有六年。晉平十一齊景公杵曰元年衛獻三十殤十三

弑蔡景四十五、鄭簡十九、曹武八、陳哀二十二、杞文三、宋平二十九、秦景三十、楚康十三、吳子餘祭元年。

春王二月辛卯衛甯喜弑其君剽音註殤公弑獻公復

歸衛剽匹妙反

喜嘗受命於其父使納獻公以免逐君之惡衛侯出入皆以爵稱於義未絕而剽以公孫非次而立又未有說焉則喜之罪應未減矣亦以弑君書何也奕者舉棋不定不勝其耦況置君乎於衍則殖也出之喜也納之於剽則殖也立之喜也弑之是棄棋之不若也不思其終亦甚矣故聖人當正其為弑君之罪示天下後世使知慎於廢立之際而不敢忽也霍光以大義廢昌邑立宣帝猶有言其罪者而朝廷加肅况私意邪蒞察恒彞之徒教

身不顧君子所以深取之者知春秋之旨矣音註說音悅

衛孫林父入于戚以叛音註書叛始於此凡叛

十七年齊高無咎之子弱以廬叛襄二十九年齊高止之子堅以廬叛不書必卿佐而後書然宋魚石入于彭城晉欒盈入于曲沃未可以書叛必若衛孫林父而後可以書叛書叛必不能討者也

甲午衛侯衎復歸于衛

按左氏孫林父以戚如晉書曰入于戚以叛者著其據土背君之罪也臣之祿君實有焉專祿以周旋戮也衛侯出奔齊入于夷儀皆以爵稱今既復歸而得國矣乃書其名何也人之有德慧術知者常存乎疾疾衛侯淹恤在外十有二年困於心衛於慮久矣此生於

憂患之時而一旦得國失信無刑猶夫人也  
則是固而弗革雖復得國猶非其國也此見  
春秋侯人改過之深而責人自  
棄之重欲其強於為善之意也

**音註**

知去聲  
衛音橫

夏晉侯使荀吳來聘

公會晉人鄭良霄宋人曹人于澶淵

**音註**

澶淵  
近戚

地蓋以討衛  
而疆戚田也

秋宋公殺其世子痤

**音註**

瘞才  
承反

殺世子母弟直書君者甚之也宋寺人伊戾  
為太子內師無寵譖於宋公而殺之則賊世  
子痤者寺人矣而獨甚宋公何哉譖言之得  
行也必有嬖妾配嫡以惑其心又有小人欲  
結內援者以為之助然後愛惡一移父子夫  
婦之間不能相保者衆矣凡此者其誰平豈

獻之殺申生宋公之殺瘞直  
稱君者春秋正其本之意

晉人執衛甯喜

八月壬午許男甯卒于楚

**音註**

靈公卒子  
悼公立

冬楚子蔡侯陳侯伐鄭

葬許靈公

春秋卷之二十三

襄公下

**乙卯** 靈王二十六年 二十有七年 晉平十二年、齊景二十四、鄭簡二十、曹武九、陳哀二十三、杞文四、宋平三十、秦景三十一、楚康十四、吳餘祭二

春齊侯使慶封來聘 **音註** 景公即位通嗣君也

夏叔孫豹會晉 平 趙武楚 康 屈建蔡 景 公孫歸

生衛 獻 石惡陳 哀 孔奐鄭 簡 良霄許人曹人 武

于宋 **音註** 屈居勿反。○晉楚始同主夏盟也。以諸侯分爲晉楚之從而交相見於是

始則是南北二伯也。天下之大變也。於溴梁而無君臣之分。於宋而無夷夏之辨。昭定哀之春



秋將以終於吳越焉爾矣。

### 衛殺其大夫甯喜。

甯喜既坐弑君之罪矣，不以討賊之詞，何也？初，衛侯使與喜言，苟反，政由甯氏，祭則寡人。甯氏納之，衛侯復國，患甯喜之專也。公孫免餘請殺之，曰：「微甯子不及此，吾與之言矣。」對曰：「臣殺之，君勿與知，乃攻甯氏，殺喜，尸諸朝。」子鮮曰：「逐我者出，納我者死，賞罰無章，何以勸沮？君失其信，而國無刑，不亦難乎？故稱國以殺，而不去其官。」

### 衛侯之弟鮒出奔晉。

衛侯之入，使鮒與甯喜約言，既殺甯喜，鮒病失言，遂出奔晉，託於木門，不鄉衛國而坐。木門，大夫勸之仕，不可曰仕而廢其辜罪也。從之，昭吾所以出也，吾不可以立於人之朝矣。

終身不仕，其稱弟，罪衛侯也。  
音註 鄉音

### 秋七月辛巳，豹及諸侯之大夫盟于宋。 音註 是於

晉楚爭先，乃先楚人，則其書先晉何？春秋不以夷狄先中國也。自宋以來，晉不專主盟矣。虢之盟，讀舊書加於牲上而已。至鄆陵，則齊主諸侯，至臯鼫，則魯及諸侯，晉之不足以主夏盟，自宋始。宋之盟，趙武之偷也。孔子曰：「庭燎之百，自齊桓公始也。」大夫之奏肆夏，自趙文子始也。此王伯之所以興衰也。

此一地也，曷為再言宋，書之重，詞之複，其中必有大美惡焉。宋之盟，合左師，欲弭諸侯之兵，以為名，而楚屈建請晉楚之從，交相見，自是中國諸侯南向而朝楚，及申之會，蠻夷之君，篡弑之賊，大合十有一國之眾，而用齊桓召陵之禮，宋左師、鄭子產皆獻禮焉。宋世子

佐以後至，遂辭而不見，伐吳滅賴，無敢違者。聖人至是，哀人倫之滅，傷中國之衰，而其事自宋之盟始也。故會盟同地，而再言宋者，貶之也。或者乃以宋之盟，中國不出夷狄不入，玉帛之使交乎天下，以尊周室，為晉趙武楚屈建之力而善此盟也，其說誤矣。

冬十有二月乙亥朔日有食之。

**丙**靈王二十二年有八年。晉平十三，齊景三，衛獻三十二，蔡景四十一。

**辰**七年崩。七，鄭簡二十一，曹武十，陳哀二十四，杞文五，宋平三十一，秦景三十二，楚康十五，卒，吳餘祭三。

春無冰。

夏衛石惡出奔晉。音註 甯喜之黨，書名惡之。

邾子來朝。

秋八月大雩。

仲孫羯如晉。音註 仲孫羯，即孟孝伯。

冬齊慶封來奔。音註 崔杼之黨，嗜酒荒淫，而出書名罪之。

十有一月公如楚。音註 於是公及宋公陳侯鄭伯許男如楚，諸夏之君。

旅見於楚始於此，是故書公朝王所以見王業之衰，書公如楚以見伯業之衰。

十有二月甲寅天王崩。音註 靈王崩，景王立。

乙未楚子昭卒。音註 康王卒弟，邾敖立。

甲寅天王崩，乙未楚子昭卒，相距四十二日，則閏月之驗也。然不以閏書，見喪服之不數閏也。齊景公葬書閏月，明殺恩之非禮也。

丁景王二十有九年晉平十四齊景四衛獻三十三蔡景四十八鄭簡二十二曹武十一陳哀二十五杞文六宋平三十二秦景三十三楚邲敖廩元年吳餘祭四弑

春王正月公在楚

歲之首月公在他國者有矣此獨書公在楚者外為夷狄所制以俟其葬而不得歸內為強臣所逼欲擅其國而不敢入故特書所在以存君也按左氏楚人使公親視夏四月送楚子葬至于西門之外還及方城季武子取卞以自封使公治告曰聞守卞者將叛臣帥師徒以討既得之矣公曰欲而言叛祇見疏也吾不可以入矣將適諸侯有賦式微者乃歸故特於歲首朝正之時而書曰公在楚使後世臣子戴天履地視君父之危且困者必有天威不違顏咫尺食坐見於羹牆之意而不以頃刻忘也此義一行豈敢有顧其身

妻子與其家而不國臣以圖富貴而背其君者乎

夏五月公至自楚

庚午衛侯衎卒

**音註**

獻公卒子襄公惡立

閻弑吳子餘祭

**音註**

閻音昏祭音債○餘祭一卒弟夷未立改名餘昧

穀梁子曰閻門者寺人也不稱名姓閻不得齊於人不稱其君閻不得君其君也禮君不使無耻不近刑人不狎敵不邇怨賤人非所貴也貴人非所刑也刑人非所近也舉至賤而加之吳子吳子近刑人也閻弑吳子餘祭仇之也左氏以為伐越獲俘焉以為閻使守舟吳子觀舟閻以刀弑之亦邇怨之失也

仲孫羯會晉

**平**

荀盈齊

**景**

高止宋

**平**

華定衛

**襄**

世叔儀鄭公孫段曹人武莒人犁滕人薛人小

邾人城杞

晉平公杞出也故合諸侯之大夫以城杞古之建國立家者必親九族然有父族而後及母族有母族而後及妻族此葛藟之詩所為次也晉王夏盟令行中國平公不能修文襄悼公之業尊獎王室恤宗周之闕而夏肆是屏輕棄諸姬可謂知本乎平王惟不懲其民而遠屯戍于母家周人怨思焉揚之水所以降為國風不得列于雅也城杞之役亦不待貶絕而音註屏音丙雜以二反可見矣

晉侯使士鞅來聘

音註

士鞅即范獻子

杞子來盟

音註

書曰子賤之也凡來盟皆大夫也杞伯親之故賤之也杞雖稱

子矣前乎此夷儀之會稱伯後乎此卒復稱伯來盟特稱子見春秋之貶諸侯也春秋之褒絕君大夫莫備於隱桓莊之世成襄而下舍杞子無貶其爵者舍楚子虔無生名之者經之變文

吳子使札來聘

音註

吳聘始吳始若臣並見吳驟強也

札者吳之公子何以不稱公子貶也辭國而生亂者札之為也故因其來聘而貶之示法焉按吳子壽夢有子四人長曰諸樊次曰餘祭次曰夷末札其季子也壽夢賢季札欲立以為嗣札辭不可然後立諸樊諸樊既除喪則致國於季子又辭而去之諸樊乃舍其子而立弟約以次傳必及季子故諸樊卒而餘祭立餘祭卒而夷末立夷末卒則季子宜受命以安社稷成父兄之志矣乃徇匹夫之介節辭位以逃夷末之子僚僚既立諸樊之子

光曰先君所以不與子國而與弟者凡為季子爾將從先君之命歟則季子宜有國也如不從先君之命則我宜立僚烏得為君於是使專諸刺僚而致國乎季子季子不受去之延陵終身不入吳國故曰季子辭國以生亂因其來聘而貶之示法焉或謂子貢問於孔子曰伯夷叔齊何人也曰古之賢人也怨乎曰求仁而得仁又何怨子貢以先聖賢夷齊知其惡衛輒之爭而不為也季子辭位獨不為賢而奚貶乎曰叔齊之德不越伯夷孤竹舍長而立幼私意也諸樊兄弟父子無及季札之賢者其父兄所為眷眷而欲立札公心也以其私意故夷齊讓國為得仁而先聖之所賢以其公心故季子辭位為生亂而春秋之所貶苟比而同之過矣或曰世衰道微暴行交作臣篡其君者有之子篡其父者有之季子於是焉而辭位則將使聞其風者貪夫廉爭夫讓而篡弒奪攘之禍損矣其於名教

豈不有補何貶之深也曰春秋達節而不守者也晉大伯奔吳而不反季歷嗣位而不辭武王繼統受命作周亦不以配天之業讓伯邑考官天下也彼王僚無季歷之賢武王之聖而季子為大伯之讓立至德乎使爭弒禍興覆師喪國其誰階之也若季子之辭位守節立名全身自牧則可矣槩諸聖王之道則過矣中庸曰道之不明不行也我知之矣季子所謂賢且智過而不得其中者也使由於季歷武王之義其肯附子臧之節而不受乎惜其擇乎中庸失時措之宜爾此仲尼所以因其辭國生亂而貶之也或曰吳子使札與楚子使椒秦伯使術一例爾吳楚蠻夷之國秦介戎狄之間其禮未同於中夏故使人之來皆畧之而札何以獨為貶乎曰春秋多變例聖筆有特書荆楚無大夫而屈完書族王朝下士以人通而子突書字諸侯公子以名著而季友書子母弟之無列者不登其姓名

而叔胥書氏皆賢而特書者也季札讓國天下賢之若仲尼亦賢季札必依此例或以字或以氏或以公子特書之矣今乃畧以名紀此於楚椒秦術之流無異稱焉是知仲尼不以其讓國為賢而貶之也噫世之君子盛稱季札之賢於讓國之際以為禮之大節不可亂也公子喜時春秋猶賢其後世於季札則何獨貶之深也曰仲尼於季子望之深矣責之備矣惟與天地同德而達乎時中然後能與於此非聖人莫能修之豈不信夫

註 長上聲下同祭音債惡去聲舍上聲為去聲

秋九月葬衛獻公

齊高止出奔北燕音註 高止高厚子也北燕姬姓之國召公奭之後今

燕國薊縣是也北燕始見經

冬仲孫羯如晉

戊景王三十年晉平十五齊景五衛襄公惡元年蔡景四十九弑鄭簡二十三

曹武十二陳哀二十六祀文七宋平三十三秦景三十四楚邾敖二吳夷末元年

春王正月楚子使遠罷來聘音註 遠于委反罷音皮○邾敖

書楚子遠罷書名氏儼然無異於中國矣

夏四月蔡世子般弑其君固音註 景公弑靈公般立

五月甲午宋災宋伯姬卒

穀梁子曰取卒之日加之災上者見以災卒也伯姬之舍失火左右曰夫人少避火乎曰婦人之義傳姆不在宵不下堂遂速乎火而死婦人以貞為行者也伯姬之婦道盡矣詳

其事賢伯姬也。易曰：恒其德貞，婦人吉。夫子凶，而或以為共姬女而不婦非也。世衰道微，暴行交作，女德不貞，婦道不明，能全其節，守死不回，見於春秋者，宋伯姬耳。聖人冠以夫謚，書於春秋曰：葬宋共姬。以音註，姆音茂，著其賢行，勵天下之婦道也。

天王殺其弟佖夫。

王子瑕奔晉。

秋七月，叔弓如宋，葬宋共姬。

良霄出奔許，自許入于鄭，鄭人殺良霄。

按左氏：良霄汰侈嗜酒，諸大夫皆惡之，而與公孫黑爭黑，因其醉伐之，良霄奔許，自許入鄭，以伐公門，弗勝，死於羊肆，不言復入者，其位未絕也。若宋無石晉，則法國三年其稱。

復入位已絕矣，不言復入者，其位未絕也。若華亥之人南里，宋辰之人蕭，其書殺也，皆據土背君以自保，未有滅國之謀也，不言殺其大夫者，非其大夫矣，討賊之詞也。

冬十月，葬蔡景公。

晉人平齊人，景宋人，平衛人，襄鄭人，簡曹人。

莒人比邾人，悼滕人，杞人，文小邾人，會于澶淵。

宋災故音註。諸侯之大夫不序，晉不足以為盟主也，晉之不足以主盟。

自宋始，傳曰：不書魯大夫，譏之也。

春秋大法：君弑而賊不討，則不書葬。況世子之於君父乎？蔡景公何以獨書葬？遍刺天下之諸侯也。葬送之禮，在春秋時，視人情之疎密而為之者也。有嘗同盟卒而不赴者，有雖

同姓赴而不會者則以哀死而致禭為輕弔生而歸賻為重必矣今蔡世子般弑其君藏於諸侯之策而往會其葬是恩義情禮之篤於禽獸中國之所以貴於夷狄以其有父子之親君臣之義耳世子弑君是夷狄禽獸之不若也而不知討豈不廢人倫滅天理乎故春秋大法君弑賊不討則不書葬而蔡景公特書葬者聖人深痛其所為遍刺天下之諸侯也魯隱宋殤之賊不討則不書葬蔡景公賊亦不討而持書葬猶閔僖二公不承國於先君則不書即位桓宣篡弑以立而反書之也何以知聖人罪諸侯之意如此乎以下文書會于澶淵宋災故而貶其大夫則知之矣二百四十二年之間列會亦衆而未嘗言其所為者此獨言其所為何遍刺天下之大夫也大夫以智帥人者也智者無不知當務之為急不能三年之喪而總小功之察放飯流

歆而問無齒決是之謂不知務蔡世子般弑其君天下之大變人理所不容也則會其葬而不討宋國有災小事也則合十二國之大夫更宋之所喪而歸其財則可謂知務乎陳恒弑簡公孔子沐浴而朝告於哀公請討之公曰告夫三子者子曰以吾從大夫之後不敢不告也之三子告不可子曰以吾從大夫之後不敢不告也叔孫豹音趙武而下皆諸侯上卿執國之政者也三綱國政之本至於淪絕無父與君是禽獸也禽獸逼人雖得天下弗能一朝處矣昔者伯禹過門而不入放龍蛇也周公坐而俟旦驅猛獸也今世子弑君三綱淪絕禽獸逼人則與之同羣而不恤有國者不戒於火自亡其財苟其來告甲之可也則合十二國之大夫駐于澶淵而謀更其所喪尚為知類也乎夫蔡之亂其猶人身有腹心之疾而宋之災譬諸桐梓與雞犬也謀宋災而不恤蔡之亂奚啻於養桐梓求雞



犬不顧其身有腹心危疾而不知療者哉以爲未之察也可謂不智苟察此而不謀則來而不仁矣是故諸國之大夫貶而稱人魯卿諱而不書又特言會之所爲以垂戒後世其欲人之自別於禽獸之害也可爲深切著明矣或曰夫穆叔趙孟向戌子皮皆諸侯之良也而所謀若是何也世衰道微邪說交作以利害謀國家而不知本於仁義也久矣是以至此極孔子所爲懼

春秋所以作乎

巳景王三十有一年晉平十六齊景六衛襄二蔡靈公般元年鄭簡二十

四曹武十三陳哀二十七杞文八宋平三十四秦景三十五楚邲敖三吳夷末三

春王正月

夏六月辛巳公薨于楚宮

九月癸巳子野卒

牛般子赤弑而書卒子野過毀亦書卒何以弑乎曰閔公內無所承不書即位則子般之弑可知下書夫人姜氏歸于齊上書公子赤弑孫得臣如齊赤之卒也隱而不日則子赤之弑可知與子野異矣子野有命立昭公故穆叔雖不欲而不能止也

巳亥仲孫羯卒音註 羯居 竭反

冬十月滕子來會葬音註 諸侯來會 葬始於此

癸酉葬我君襄公

十有一月莒人弑其君密州音註 犁比公弑 子展與立

經以傳爲案傳有乖繆則信經而棄傳可也若密州之事是矣左氏稱莒子生去疾及展

輿既立展輿又廢之莒子虐國人患焉展輿  
因國人以攻莒子弑之乃立信斯言則子弑  
其父也而春秋有不書乎故趙匡謂其文當  
曰展輿因國人之攻莒子弑之乃立而後來  
傳寫誤為以字爾左氏博通諸史叙事尤詳  
能令後人得見本末因以求意經文可知而  
門弟子轉相傳受日月既久浸失本真如書  
晉趙盾許世子止等事詳考傳之所載以求  
經之大義可也而傳不可疑如莒人弑其君  
密州獨依經之所言以證傳之繆誤可也而  
傳不可信盡以為可疑而廢傳則無以知其  
事之本末盡以為可信而任傳則經之弘意  
大旨或泥而不通矣要在  
學者詳考而精擇之可也

經子

